# 



القفص الطائر

مواقف وتجارب من قتال سلاح الجو المصرى

25.56

لواء طیار محمد زکی عکاشته

General Organization of the Alexandria Library (199AL)

# القفص الطائر مواقف وتجارب من قتال سلاح الجو المصرى

ANTO

الله: العامة لمكتبة الاسكتدرية قيم التعام - 350 م 250 م م التعام - و م م م السجد ل: ١٩٢٢ م

رئيس مجلس الإدارة:
ا. د سمير سرحان

رئيس التحرير: جمال الغيطاني

مدير التحرير سعيد عبد الفتاح

الغلاف

والتصميم الجرافيكي

للفنان: محمود الهندى

#### هزيمة البطولة

كان أحد أيام الشتاء الدافئة ، خلت فيه السهاء من السحب ، وسطعت الشمس فأكسبته دفئا لذيذا . . شجعه على أن يصحب أسرته الصغيرة المكونة من زوجته سناء وابنه هشام الذى يناهز الثالثة من عمره إلى حديقة الحيوان ، حيث نزهة ابنه المحببة . . جلس فى ركنه المفضل فى جزيرة الشاى يرشف قدحا من الشاى هو وزوجته ، وابنه وقف بجوار السور الحديدي يقذف بقطع الخبز إلى الماء ، ضاحكا فى كل مرة يرى فيها صراع الأوز من أجل قطعة الخبز . .

وغابت المناظر المحيطة عن عينيه حتى لم يعد يرى إلا تلك السعادة المجسدة في ضمحكات بريئة تخرج من قلب ابنه في عفوية وظفولة عذبة . . وقطع عليه إحساسه صوت سناء وهي تبتسم بعد أن ظلت ترقبه فترة .

\_ أحمد . . مالك بتبص لهشام كده ليه ؟ زى ما يكون مفيش حد عنده ولد غيرك انت .

\_ إحساس غريب يا سناء ، ما أقدرش أوصفه ، لكن أقدر أقول الدنيا وما فيها ما تسواش ضحكة طفل رانت على وجهه مسحة من الحزن الخفيف وتابع قائلا :

ــ تعرفی یا سناء ، أنا كل مره أعمل فیها غــاره علی الیهــود بأحس إنی مش راجع ، وأقول فی نفسی یا تری یا هشام حاتعیش إزای من غیری

ــ يا حبيبى الأعمار دى بيد الله . وربنا يخليك لغاية ما تشوفه راجل ، وتشوف أولاده كمان .

ــ ما أنا عارف إن الأعمار بيد الله لكن انت شايفه بنفسك كل يوم والتانى واحد مننا بيموت . . هو أنا مش زى نبيل وحسين وصلاح وغيرهم كتير ، والا أنا أحسن منهم ، وكل واحد فيهم برضه ساب زوجه وساب أطفال .

وقاطعته زوجته حتى لا ينساق وراء هذا الإحساس الحزين ، وكانت قد تعودت على مثل تلك الأحاديث التى يتناول فيها الموت بسهوله غريبة ، من طول ما كان يرددها ومن كثرة ما غرفت طيارين زملاء له استشهدوا فى معارك بل وفى التدريبات أيضا .

ــ احكى لى يا أحمد عملتوا إيه في الغاره الأخيرة . . الجرايد كلها كانت بتتكلم عليها .

\_ أبدا زي كل مره رحنا وضربنا ورجعنا .

\_ بقى الجرايد كل يوم بتحكى عن حرب الاستنزاف ، والطيارين عملوا ، والطيارين عملوا ، والطيارين ضربوا ، وأنا بابقى قاعده مستنياك علشان تحكى لى وبعدين تيجى تقول رحنا وضربنا ورجعنا . . نفسى أعرف صربتم ازاى ؟ اليهود عملوا إيه لما شافوكم ؟ نفسى أتفرج عليك مره وانت بتضرب عند اليهود .

ورد عليها أحمد في سخرية :

ــ خلاص ابقى روحى استنى جنب الحته اللى حانضربها علشان تشوفينى . وردت عليه بعفوية وسذاجة دون أن تفكر .

\_ لا أنا عايزه أبقى معاك في الطياره .

وتجاهل كلماتها قائلا كمن يحدث نفسه:

ــ تعرفی أنا نفسی فی إیه دلوقت ؟ نفسی اخلف أخ لهشام . . برضه یبقی حسن .

وقاطعته مرة أخرى وهي تعلم ما يرمي إليه بهذه الكلمات :

ــ حسن وليلى اتكلموا امبارح في التليفون وقالوا يسيبوك لى أول يوم في الأجازة والنهارده حايسهروا معانا في البيت .

\_ كل ما أفكر إنك كمان ممكن تتجوزى واحد زى حسن من الشغل للبيت والساعه اتنين بالثانية يروح بيته ، ولا حرب ولا سفر ، ولا وجع قلب كل يوم . . أقول صحيح الجواز ده قسمه ونصيب .

ونظرت إليه نظرة كلها حب وحنان:

\_ يا ميدو إنت فاكر ان فيه حد يملا عيني زيك ، والنبي ولا عشره زى حسن ييجوا جنبك حاجه . . ده أنا بامشي معاك في الشارع وحاسه إني أحسن من كل الستات اللي حواليه . . كفاية إني ما شيه مع بطل .

كانت كلماتها حارة جعلته يشعر بحنانها . . لكن سخريته غلبته :

\_ حلوه بطل دى . . فكرتيني بصابر الحلاق واحنا طلبه في الكلية كان أي واحد داخل يحلق يفضل يقول له يا بطل لغاية ما يخلص وكل ده علشان الشلن البقشيش .

وفى المساء جاء صديقه حسن وزوجته وكان فى شوق إليها حيث لم ينل أجازة من شهر تقريبا ، وكان حديث السهرة هو تلك الحرب الدائرة من عدة أشهر والتى لم تتضح نتائجها بعد ، كان حسن يهاجم تلك الحرب ويرى أنها حرب استنزاف لنا وليس لا سرائيل . . وأحمد يدافع ويشعر أن حسنا يهاجمه فى كيانه وداته ، وكيف لا وهو الذى يساهم فيها ليل نهار ويشعر أن حياته يمكن أن تنتهى فى لحظة من لحظاتها .

وانتهت السهره مبكرا على أمل أن يلتقوا مساء الغد وهو اليوم الأخير في أجازة أحمد لتمضية السهرة بالخارج .

\_ حسن . . مش حانقدر نخرج النهاردة زى ما اتفقنا .

ــ ليه ؟ . . خبريا أحمد .

ــ خير الحمد لله . . أصل هشام تعبان شويه . . سخن شويه مش عارف ليه . . والنبى يا حسن أنا مسافر بكره المطار لإن ضرورى أكون هناك فلو ممكن تبقى نتصل بسناء علشان لو احتاجت حاجه .

\_ ما تقلقش يا أحمد وسافر انت بالسلامة .

وبات أحمد ليلته وهو يشعر بقلق خفى لكن تغلب عليه بأعصابه القويه آملا أن تكون وعكة عادية تمر بكل طفل . . وعاد من أجازته ودخل إلى مبنى السرب وظل

خفيف من الاكتئاب يكسو وجهه . . وبادره قائد السرب ضاحكا :

ــ مالك راجع مبوز ليه ؟ لا زم الحكومه نكدت عليك في الأجازة . علشان كده أنا بأقول الطيارين مش لازم ينزلوا أجازات .

- \_ لا أبدا يافندم . . أصل ابني تعبان شويه وسايبه عنده حراره .
- \_ يا راجل كل العيال بتسخن ولا يهمك بكره يخف ويبقى تمام .

ومر اليوم وهو في دوامة العمل التي لم تترك له فرصة لكى يفكر في ملاكه الصغير إلا عندما دخل إلى سريره في الثانية عشر مساء وقد حل عليه تعب اليوم كله . . وقام في صباح اليوم التالي وكل فكره أن يتصل بسناء كي يطمئن على ابنه . . لكن برنامج الطيران لم يترك له فرصة لكى يحقق أمنيته حتى كانت الثالثة ظهرا وتمكن من الاتصال بها ، وجاءه صوت زوجته مغلفا بالخوف واللهفة ، وإن حاولت أن تبدى تماسكها :

\_ الحمد لله الدكتور شافه امبارح وكتب العلاج . . بس لسه سخن شويه . وضغط على أعصابه ونفسه كي يخرج صوته بإردا ومطمئنا :

ــ ما تخافيش ، انشاء الله خير وأنا حا أحاول أنزل بكره علشان أشوفه . .

وذهب يتناول غداءه ونفسه تملؤها الهواجس لكنه يتغلب عليها بقوة أعصاب التي. أصبحت أصلب من الفولاذ من طول ما عانت وتمرست في الموات<sup>اني</sup> الصعبة . .

وفجأة وهو يكاد ينتهى من طعامه دق جرس التليفون يطلب قائد السرب وشعر أحمد من ملامحه أن في الأمر شيئا هاما . . أكده أمر قائد السرب

ــ الطيارين كلها على السرب ، حالة طوارىء ١٠٠٪.

كان أمر القائد بعد المكالمة التليفونية حادا وقاطعا ، وفي استراحة الطوارىء التي يقضون فيها ثلاثة أرباع اليوم منذ ثلاث سنوات ، دخل عليهم القائد شارحا لهمم الموقف :

- اليهود ضربوا مصنع في أبو زعبل . . ده معناه إن الموقف بيتصاعد . . حالات الاستعداد في أماكنها . . الاجازات موقوف . . ونظر إلى أحمد وكان يليه في الأقدمية :

ــ استدعى الطيارين اللي في الأجازة يا أحمد .

وكانت الكلمات رغم أهميتها وحسمها معادة ومكررة ، فقد قابلهم العديد من مثل هذه المواقف . . فتفرقوا إلى طائراتهم مرابضين بداخلها في انتظار أوامر بالإقلاع .

وجلس أحمد داخل طائرته يسترجع كلمات قائد السرب . . « ضرب مصنع . . يبقى لابد هناك خسائر كبيره عندنا ، يا ترى كم عدد قتلانا . . لابد إن دى رد على الغاره الاخيره بتاعتنا ، اليهود ما يضربوش مصنع إلا إذا كانوا موجوعين قوى . . استنزاف لنا والا لاسرائيل ؟ » .

قطع تفكيره صوت الجرس المدوى . . إنه أمر بالإقلاع الفورى لاعتراض طائرات اليهود التى اخترقت الجبهة . وبعد ثلاث دقائق كان فى الجو يقود تشكيله نحو الهدف المعادى . . محطة التوجيه تبلغه أن الهدف على بعد ستين كيلو متراً . . ينفذ الأوامر بدقة حتى لا يترك مجالا لأى خطأ يمكن طائرات العدو منه . . يشعر أنه سيحقق نصرا فى هذه الطلعة . . المسافة بينه وبين الطائرات المعادية ثلاثون كيلو متراً . . يثق فى أفراد تشكيله ثقة كبيرة . . المسافة سبعة كيلوات . . أوامره قاطعة ومحدده لكن بهدوء وثقة غريبة . . هذه ثالث مرة يشتبك فيها مع اليهود . . الشمس تميل على الأفق فى طريقها للغروب . . العدو قادم من الشرق والشمس أمامه . .

ظهرت طائرات العدو على مرمي البصر . . أربع طائرات متخذة وضع الهجوم . . اليهودى حذر ويخفى جزءاً من قوته دائها . . سأهاجم بطائرتين فقط وسأقوم بالحماية أنا والطائرة الأخرى . . أفراد التشكيل ينفذون الاوامر بدقة ومهاره . . حانت فرصة ذهبية لكى أدفع بالطائرة الثالثة إلى الاشتباك . . سأقوم بحماية نفسى وحماية التشكيل . . اندفعت الطائرة الثالثة كها رسمت لها تماما وأسقطت طائرة للعدو . . شاهدها وهي تحترق . . سلمت يداك يا عصام . . أصغر أفراد التشكيل ، لكن نفذت ما في رأسي تماما . . طلال يصرخ فرحا في اللاسلكي إنه أسقط الطائرة الثانية . . قلبي يقفز فرحا بين ضلوعي . . طائرات العدو تحاول إنهاء المعزكه بعد تلك الخسارة . . لنترك نحن أيضا العدو فالوقود يكفي

للعودة فقط . . وحدث ما توقعته فى بداية المعركة . . طائرتان معاديتان تعززان قوة اليهود المنسحبة ، تحاول اصطياد أى طائرة أثناء العودة ، خاصة والوقود فيها لا يكفى لا شتباك آخر . .

جاء دوره لكي يحمى طائراته . . جذب طائرته لكي يهاجم الطائرتين و يبعدهما عن تشكيله العائد بسلام . . الطائرات المعادية تحاول الدخول خلفه كي تصطاده . . عمل مناورة عنيفة ليجعلهم في مواجهته وليس في مؤخرته . . نجح في إبعاد الخطر عنه قليلا . . مازال العدو يتفوق عليه . . رأسه يتحرك بعنف كعصفور فزع من طلق ناري . . ضربات قلبه يطغي صوتها على صوت هدير محرك الطائرة . . يعكس اتجاه المناورة بعنف أشد . . يلهث وهو الجالس فوق مقعد لا يتحرك . . طائرات العدو انفصلت عن بعضها كي تتمكن منه . . موقفه يسوء وموقف العدو يتحسن . . سيتمكن منه العدو . . يجذب طائرته بكل قوته نحو إحدى الطائرتين . . كاد يصطدم بها ، فقد رأى الطيار اليهودى داخل طائرته بملابسه الزرقاء . . لا يهم . . يكفي أنه أخرجه من دائرة الاشتباك . . الطائرة الأخرى تكاد تقترب من مؤخرته . . لقد بذل كل ما في وسعه . . أهي النهاية ؟ . . ليجذب مرة أخرى في الاتجاه المعاكس . . هشام مريض . . لوكان له أخ . . طائرة العـدو تتربص به ، تنتظر أن تخذله قواه فتنال منه . . سناء أرملة كبقية زوجات زملائه . . الشمس . . الشمس . . لقد وجدها عن يمينه . . ليحتمى بها . . جذب الطائرة -بكل قطرة دم ، بكل خفقة قلب . . دخل في اتجاه الشمس . . قلعا سيه رب منهم . . خرج من اتجاه الشمس بعد لحظات حسبها دهراً بأكمله . . غابت طائرات العدو عن عينيه واختفت . . لم يصدق عينيه . . دار حول نفسه بطائرته ليتأكد أن العدو تركه تماما . . وعاد إلى المطار وقلبه يرقص فرحا . . نشوة عارمة يشعر بها . . أسقط طائرتين من ست وتشكيله أربع طائرات فقط . . الأهم أن تشكيله عاد كله سالما . . واستقبله زملاؤه بالأحضان والقبلات . . كل من يقابله يعانقه . . « حمد الله على السلامه » . . رنت في اذنه مئات المرات . . جلس مع زملائه يشرح لهم ما حدث ويعيد ما قاله عشرات المرات وكأنه يجتر سعادته وزملاؤه يستزيدونه دون ملل ، وكأنهم سكارى سن نشوة النصر . .

سناء تقول إنه بطل . . رنت في أذنه الكلمات وكأنما أفاق من سكرته ، وتذكر هشاما . . فقام إلى التليفون ملهوفا وهو يشير إلى زملائه أن يلتزموا الصمت حتى يستطيع سماع صوت زوجته . . وفي لحظة غرق المكان كله في صمت مطبق . . ولم يكن هناك من صوت إلا كلمات أشبه بالنواح خرجت من فم أحمد :

\_ ایه ؟ . . ازای ؟ . . مش ممکن . . مش معقول . . . وسقطت منه سماعة التلیفون وقد انخرط فی بکاء حار ، وهو یردد لا إله إلا الله ، وتلقفه قائد السرب فی أحضانه . . وعم الصمت المکان کله . . .

### الصاروخ المهزوم

كانت الثانية ظهرا وآخر طائرات السرب قد هبطت على الأرض بعد تنفيذ مهام التدريب التي بدأت في السابعة . وكان إرهاق التدريب وحرارة يوليو اللافحة قد نالا من الطيارين ، فارتموا جميعا صامتين فوق المقاعد المتناثره في الخيمة التي كانوا يتخذونها استراحة لهم ، كانوا جميعا أشبه بمن انتهوا لتوهم من سباق للمارثون . . ودخلت عليهم الخيمة فهبوا جميعا واقفين كتقليد عسكرى احتراما لقائد السرب . وأمرتهم بالجلوس فانتظمت المقاعد المتناثرة في شكل صفوف وان كانت متعرجة لسماع ملاحظاتي على ما دار في تدريب اليوم .

\_ حمد الله على السلامه جميعا ، نسبة تنفيذ البرنامج النهاردة ٩٥٪ ، مجهود ممتاز يا قنديل انت والمهندسين وكل الميكانيكية . بالنسبة للطيارين با اكرر للمره الخمسين ، تكتيكات القتال لازم تكون عنيفه لاقصى درجه ، كل تشكيل لازم يتدرب على إنه في اشتباك حقيقى . . ولما أقول الطيران على ارتفاع عشرين متر يبقى لا زم كلنا نلتزم ، عصام انت كنت أعلى من عشرين متر ليه ؟ قادة التشكيلات مسئوله عن تنفيذ الملاحظات ، لأن كل . . .

وقطع رنين التليفون استكمال الملاحظات وكانت قيادة القوات الجوية تطلبني شخصيا .

ـــ آلو، أيوه يا فندم النقيب طيار محمد مع سيادتك . . جاهز يافندم . . ثانيه واحذه يافندم علشان أكتب .

والتقطت النوتة الخاصة بى والقلم لكتابة الأوامر التى يبدو أنها هامة من لهجة المتحدث

ـ ايوه يافندم . . ٨ طيارات . . مهاجمة منطقة شئون اداريه وموقع صواريخ هوك في منطقة رمانه على الطريق الشمالي . . تسليح كل طياره اتنين قنبله زائد ٨ صواريخ . . الهدف ٣٥ كيلو شرق القناه . . توقيت الهجوم مبدئيا الساعه ١٨٠٠ حاضر يافندم . . لا الطيارات حاتجهز كمان ساعه بالكتير . . أوامرك يافندم .

والتفت إلى ضباط السرب وقد ران عليهم الصمت غير مصدقين أن الأوامر قد صدرت بمهاجمة المواقع الاسرائيلية . . وعلى الفور استجمعت تفكيرى وهدوئى ، فقد كنت أنا أيضا غير مصدق :

ــ زى ما سمعتوا حانهاجم اليهود ، قنديل اتفضل انت والمهندسين تجهزوا ٨ طيارات بالتسليح كامل وطبعا ٢ احتياطى عايز تمام التجهيز بعد ساعه ، ياللا ورونا الهمه . . الطيارين تجيب الخرائط ، وكل واحد يجيب الطبنجه بتاعته معماه . . أحمد ، الغدا تروح تجيبه العربيه من الميس .

وفي لمح البصر انفض الجميع من حولي ، ويقيت وحدى في الخيمة أسترجع الأوامر التي صدرت لى ، أفكر في المهمة وكيفية تنفيذها . . موقع الهوك سيكون من نصيبي ، فهي المهمة الأصعب وأنا قائد السرب . حمدى يقود التشكيل المكلف بتدمير منطقة الشئون الإدارية . . الصاروخ الهوك يدمر الطائرات على ارتفاع ٣٠ متراً . . جرثومة الخوف تتسلل داخلي . . أول مرة أقود السرب في عمليات حقيقية . . هل سانجح في تدمير الهوك أم سيدموني هو ؟ . ساستخدم الارتفاع للهروب منه . . ساطير على ارتفاع ١٥ متراً ، وساطير إليه مباشرة . . لو وصلت إلى الموقع أمان منه ، فهو يعجز عن تدمير الطائرات التي فوق الموقع . . إنها المنطقة الميتة للصاروخ . . .

وانقطع حبل تفكيرى بعودة الطيارين ، والغريب أن وجوههم قد زال منها كل أثر للتعب أو الإرهاق . . وبدأت في إعطاء أوامرى على خريطة كانت مفرودة على منضدة :

\_ أنا ومعايا طلال وحسن ومجدى حاناخد موقع الهوك ، وحانطير مباشرة من فوق المنصورة على ارتفاع ١٥ متر ، حمدى ومعاك عصام وجابر ورفعت بعدى بدقيقة ، التشكيل بتاعك يا حمدى يدخل على مدينة القنطرة وبعدين تاخد اتجاه منطقة الشئون الادارية . كده يبقى حمدى حايوصل المنطقة بعدى بدقيقتين ، يعنى أنا والتشكيل بتاعى حانكون دمرنا موقع الهوك انشاء الله . . حمدى حاتهاجم براحتك ، يبقى عايز نتايج عاليه ، يعنى تدمير شامل لمنطقة الشئون الاداريه . الهجمه الاولى قنابل والتانيه الـ ٨ صواريخ .

\_ ممكن يا افندم نعمل هجمه تالته بالمدافع .

وبصوت تعمدت أن يكون حاسها:

ــ هجمتین اتنین بس ، المدافع علشان لوحصل اشتباك مع المیراج اللی احتمال كبیر حایطاردنا واحنا راجعین .

\_ ولو الميراج اعترضنا قبل ما نوصل الاهداف يا أفندم ؟

ـ على ارتفاع ١٥ متراً اللى احنا حانطير عليه مفيش رادار اسرائيلى حايكشفنا ، يعنى أول بلاغ عننا لما حانكون بنعبر القناه . . يبقى الميراج احتمال يعترضنا بعد ما نكون ضربنا وراجعين ، بس برضه كل واحد عينيه فى وسط رأسه من أول ما نعبر القناه . . ولو اعترضتنا الميراج بتاعتهم نرمى الحموله على طول ونشتبك معاهم .

وحاولت أن استكمل تعليماتي بصوت هاديء بعد أن لاحظت أن التوتر يبدو على وجوه الجميع :

ــ من هنا لغاية القناه اللاسلكي على قناة ٢ بس ما حدش ينطق بكلمه لغاية القناه ، علشان التصنت اللاسلكي بتاعهم ممكن يلقطنا . . آخر حاجه لو أنا حصل لى أي حاجه حسن حايقود التشكيل . .

وانكب الجميع على الجرائط كل يحاول أن تكون خريطته هي الأدق من ناحية الحسابات الملاحية . . وأصبح أفراد السرب جميعا وكأنهم في سباق مع الزمن ، كل يريد أن ينهى ما كلف به في أسرع وقت ممكن . . وقبل الثالثة بخمس دقائق كانت الطائرات قد تم تجهيزها ، وهو زمن قياسي للتجهيز ، لكن قنديل مهندس السرب

كان ذا كفاءة عالية تمكنه من هذا الأداء المتميز . وكان الطيارون قد حفظوا مهامهم عن ظهر قلب ، وتم إبلاغ غرفة العمليات بتمام الاستعداد لتنفيذ المهمة ، وطعام الضباط قد وصل فى العربة . . والترقب والقلق قد بديا واضحين على الوجوه . . وهدأت الأصوات وساد المطار تيار من الصمت الغريب . . وكان لابد من شىء يكسر حدة التوتر المرسوم على كل الوجوه . .

ــ ياللا يا جماعه ناكل لقمة ، وانت يا . . قنديل خللي الميكانيكيه يريحوا جنب الطيارات لغاية ما تيجي أوامر الطلعه .

والتف الجميع حول الطعام يأكلون دون شهية ، حتى انتهوا منه في دقائق وكأنه مجرد تنفيذ للأوامر . . وشعرت بأنه لابد وأن يدور حديث ما حتى نخرج جميعا بما فيهم أنا من هذا التوتر :

- ــ ياللا يا مجدى رشة شاى على حسابك للسرب .
- ـ يا نهار اسود يافندم اسقى كل دول ، ده يبقى جزا لى يافندم .
  - واندفع واحد من الطيارين :
- - ـ هو انت بس شاطر تشرب لما يكون على حساب حد تاني !
    - ـ يا أخى بطل شغل اليهود ده .
      - ــ والله المفروض إنك . . . .

وهكذا انساب الحديث وتداخل فيه الجميع ، وتناثرت الكلمات والضحكات ، وإن كانت مشوبة بشيء من العصبية . . وتسللت أنا وحيدا من الخيمة ناظرا إلى السهاء ، إلى لا شيء .

ـ الصاروخ الهوك بيدمر الطياره على ارتفاع ٣٠ متر . . بقى لنا سنه بنضرب بالمدفعيه ، ايه اللى حصل علشان نهاجمهم بالطيران النهارده . . يا ترى حارجع من الطلعه دى ؟ . . المعن حاجه الوقت الطويل اللى بنتظر فيه . . المفروض أوامر الطلعه تيجى وبعدها ننفذ على طول . . العمر واحد ، والمكتوب مكتوب . . أول

مره واحد فى مصر يهاجم بطارية الهوك وبايه ؟ بطياره ميج ١٧ . طارق ابنى عنده سنتين ، وكان نفسى أجيب له أخ . . يا ترى يا منال حاتجيبى ولد والا بنت . لسه فاضل شهرين على الولادة . . بس أنا حاسس إنى حا أوصل للهوك وحاأضربه . . أما لو وصلنا ورجعنا إحنا التمانيه ٢٠ يوليو ٦٩ حايتسجل فى التاريخ . . طول الوقت والانتظار ده شيء فظيع . . من أول ما مسكت السرب والظباط بتقول إنى شديد عليهم على طول . . كنت بااشد عليهم فى التدريب علشان يوم زى ده . . لا نشوف النتيجه حاتكون ايه النهارده . . ؟

وانتبهت على نداء حمدى على لكى أرد على التليفون الذى يطلبنى شخصيا .
\_ ايوه يافندم كله تمام وجاهزين . . حاضر يافندم . . أوامر سيادتك . .
لا . . إنشاء الله خير .

تحدد موعد الهجوم بعد نصف ساعة ، وكان هذا الأمر كفيلا بأن ينتشلنا جميعا من التوتر والقلق الذين كانا يسيطران علينا طوال فترة الانتظار ، فقد اتجهت بكل أحاسيسي ومشاعري إلى الطيران وكيفية تنفيذ المهمة . . وعلى الفور اجتمعت في الخيمة بالطيارين المشتركين في المهمة فقط ، كي اطمئن إلى تفهم كل منهم لدوره في الطلعة ، مكررا عليهم التعليمات السابقة ، حتى لا أترك شيئا للظروف .

ــ انشاء الله حانروح إحنا التمانيه وحانرجع برضه إحنا التمانيه . .

\_ أحتمال واحد ميراج من عندهم يتوه ويرجع معانا ونبقى رجعنا تسعه .

وكان لذلك التعليق آلذى قاله رفعت مفعول السحر بين الطيارين ، فقد انطلقت تعليقاتهم وضحكاتهم ، وتركت لهم الفرصة حتى يزول منهم أى توتر أو رهبة . . ثم وقفت استعدادا للانطلاق :

\_ نقرا الفاتحه كلنا إن ربنا يوفقنا في الطلعه ونعمل نتائج كويسه .

وانطلقت إلى طائرتى وأنا أتمتم بآيات قرآنية ، تعودت على قراءتها منذ بدأت تعلم الطيران . . وبينها الميكانيكي يقوم بربط أحزمة المقعد حول كتفي ، لمحت قنديل مهندس السرب يقف بجوار جناح الطائرة ووجهه مضطرب أشد الاضطراب وفي نفس اللحظة كان أحد الميكانيكية يقبل الصواريخ المحملة بجناح الطائرة .

وانطلقت بالطائرة في الثانية المحددة ، وفوق المنصورة وجهت نفسي وطائرتي إلى اتجاه موقع الهوك . . وعلى ارتفاع ١٥ متراً وبنظرة سريعة تأكدت أن كل أفراد التشكيل في مواقعهم المحددة . . السرعة ٣٠٠ كيلومتر . . الأرض حولي مزروعة بالقطن والذرة والقرى متناثرة على مرمى البصر . . الصاروخ الهوك يدمر الطائرة على ارتفاع ٣٠ متراً . . « من المؤمنين رجال صدقوا ما عاهدوا الله عليه » . . الاتجاه انحرف ثلاث درجات لليسار . . سأعبر القناة في الاتجاه الصحيح . . التشكيل في منتهى الدقة . . التدريب العنيف ظهرت نتائجه . . أحب كل تلك الحقول والترع والقرى . . أشم رائحة الطين رغم الكابينة المحكم غلقها على . . دقيقتان ونصل إلى القناة ، هل ستعترضنا الميراج قبل وصولنا للهدف . . السرعة ، الاتجاه ، الارتفاع . . القناة على مرمى البصر . . سيناء مرة أخرى بعد عامين . . يارب ، خمسة وثلاثون كيلو متراً ونصل إلى بطارية الهوك . . سيناء المحتلة شاهد عجزنــا وتقصيرنا . . اين الميـراج الاسرائيـلي . . الارتفاع ١٥ متـراً . . قلبي ينتفض في صدري ، يداي تتشنجان على عصا القيادة . . دقيقة واحدة وأدخل المنطقة الميتة فوق الموقع . . إلهي . . صاروخ يمرق من أمام الطائرة ، أكاد أسمع صوت حشـرجة اللهب المنبعث من ذيله ، من شدة قربه مني . . لم يصب أحد من التشكيل ، لقد نجحت خطتي في الطيران على ارتفاع ١٥ متراً . . ارتفاعنا المنخفض يحمينا منه أوامر للتشكيل بالاستعداد للهجوم . . ها هو الموقع أخيرا والصاروخ الثاني ينطلق من فوق القاذف مخلفا سحابة من الرمال تحدد الموقع تماما . . أحمدك يارب . . لقد أصبحت فوق الموقع وانتهى الأمر . . فقد تمكنت مّنه .

ــ الموقع على شمالنا بالظبط ، أنا وطلال حانهاجم مركز القياده ، حسن ومجدى حاتهاجموا الرادار .

وبدأ التشكيل في التنفيذ بدقة وبراعة لم أكن أنا نفسى أتوقعها منهم وارتفعت بالتشكيل إلى ٨٠٠ متر ، استعدادا لقذف القنابل . . وكان الموقع تحتى يبدو وكأنه صورة مجسمة . . ووضعت الطائرة في وضع الانقضاض ، وغاب كل شيء عن ذهني ولم أعد أشعر بشيء من حولي ، سوى أن عيني قد تحجرتا من خلال جهاز التنشين على مركز القيادة ، خشية أن ينحرف التنشين قيد أنملة . . واستمر هذا

الوضع لثلاث ثوانى كنت قد وصلت خلالها إلى ارتفاع ٤٠٠ متر ، وفي لمح البصر تأكدت من السرعة وكانت ٢٥٠ كيلو متراً ، وكانت تلك هي اللحظة المناسبة فضغطت باصبعي على زر إسقاط القنابل . ثم على الفور بدأت في الحروج من الانقضاض . .

\_ الله ينور يافندم . . القنابل نزلت في حجر الراجل اللي في مركز القيادة .

أسعدنى تعليق حسن أيما سعادة ، فقد كان خلفى وكلماته تدل على أن قنابلى قد أصابت الهدف تماما ، وبهذا توقفت بطارية الهوك عن العمل . وخرجت من الهجمة الأولى وارتفاعى حوالى ١٠ أمتار هربا من المدفعية المضادة التي ستحاول أن تصيب أيا من طائرات التشكيل . . وبدأت الالتفاف بطائرتي استعدادا للهجمة الثانية .

\_ كل التشكيل على ارتفاع ١٠ متر علشان الـ م/ك

وارتفعت بالطائرة مرة أخرى إلى ٧٠٠ متر ، ثم وضعت الطائرة في وضع الانقضاض على أحد الرادارات . وتكرر ما حدث في الهجمة الأولى من تحجر عيني على الهدف حتى ضغطت على زر اطلاق الصواريخ . . وفي ثوانٍ معدودة كانت الصواريخ الثمانية تخترق الرادار فتحيله إلى كتلة من لهب . .

وانتابني شعور غريب بالراحة . . كنت أشعر كمن أنزل حملاً ثقيلاً من على كتفيه . . والتفت حولى كي ألاحظ باقى طائرات التشكيل ، فرأيت حسنا ومجدى يهاجمان ببراعة ، رغم أن هناك مدفعية مضادة للطائرات بدأت في مطاردتنا كي نتوقف عن مهاجمة الموقع ، أو على الاقل نرتبك فتأتي هجماتنا غير مؤثرة .

ــ إيه يا حمدى أخبارك إيه ؟

\_ كله تمام يا فندم ، فى الهجمه التالته والموقع تقريبا انتهى وأعلى حاجه فيه دلوقت هى الرصيف . ولم أترك حمدى وتشكيله يتمادى فى حماسه ، فقد خالف أوامرى بتلك الهجمة الثالثه .

ــ حمدى ، اوقف الهجوم خلاص . . جمع التشكيل بتاعك وخد اتجاه العوده .

ــ حاضر يافندم .

کل الطیارین تبص حوالیها کویس ، احتمال المیراج یظهر دلوقت .
 وترکت موقع الهوك وتجمع باقی أفراد التشکیل حولی فی مواقعهم المحددة . .
 وبعد أقل من دقیقة ظهر علی البعد حمدی وتشکیله بعد أن ترك الموقع هو الآخر .

ــ أنا على بينك على طول يا حمدى . . مسافتي منك ٣ كيلو .

ـُــ شايفك يافندم ، وحا اضم عليك .

انتابني شيء من الزهو بداخلى ، لكنى قضيت عليه فى لحظتها ، حين تذكرت بأنه ببجب أن أعود بالثماني طائرات وكنا مازلنا على بعد دقيقتين من القناه . . كانت عيناى تمسحان السهاء بحثا عن الميراج الاسرائيلى ، حيث هى الخطر الذى يهددنا فى هذه المرحلة من الطلعة . . سينا . . هل سيقدر لى العودة إليك مرة أخرى . . سأبقى على ارتفاع ١٥ متراً حتى القناة . . العرق يتصبب منى بغزارة ليست من طبيعتى . . القناة على مرمى البصر . .

\_ القناه تحتنا يافندم .

انطلقت الكلمات من جابر في جهاز اللاسلكى ، وكان يبغى أن يطمئن الجميع إلى أننا أصبحنا فوق أرضنا وفي حماية دفاعنا الجوى ، الذى سيتكفل بأية طائرة معادية مقتربة منا . . وشعرت بأن الغدة اللعابية عندى قد بدأت تعمل لتزيل جفاف جلقى الشديد الذى بدأت أشعر به الآن فقط . .

وما إن عبرت القناة وأصبحنا فوق الضفة الغربية ، حتى بادرت بالتسلق التدريجي حتى وصلت بالطائرة إلى ارتفاع ١٠٠٠ متر وتنفست الصعداء ، وخيل إلى أن هذه المائة متر ارتفاع كبير جدا ، رغم أننا نتدرب على هذا الارتفاع في مرحلة الطيران المنخفض . . ثم تابعت التسلق بعد فترة إلى ارتفاع ١٠٠٠ متر ، فامتلأت عيناى بخضرة المزارع والحقول الممتدة أمامي ، فانزاح عنى كل تعب كنت أشعر به ، بل سرى في داخلي استرخاء غريب . .

وهبطنا ثمان طائرات بسلام ، وغادرت طائرت بعد أن أوقفت المحرك ، وفوجئت بالميكانيكية وهي تتجمع حولي ثم يحملوني لأعلى وهم يهتفون باسم مصر . . وشعرت بحرج شديد وطلبت منهم أن ينزلون . . فاستجابوا على الفور ،

لكن أمطرونى بقبلات لا حصر لها . . والكل يردد كلمات واحدة كـأنهم متفقون عليها

\_ ألف مبروك . . حمد الله على السلامه .

وفى دقائق معدودة كنا قد تجمعنا مرة أخرى فى الخيمة ، الكل يكاد يقفز فرحا وطربا . . الجميع يتكلمون ولا أحد يستمع . . الطيارون يحتضن بعضهم بعضا . . الكل يقبل بعضه . . ثم تتكرر الأحضان والقبلات . . المشتركون فى الطلعة يحكون للباقى تفاصيل ما تم فى الطلعة وما شاهدوه لدى اليهود . . يقطع تلك الحكايات تعليقات وضحكات الباقين . .

- \_ شفت المدفع اللي كان على يمين النقيب حمدى ؟
- \_ أنا قلت جابر حايرشق في الأرض . . كان بينه وبين الأرض مش اكتر من
  - ــ وإحنا رايحين قلت النقيب محمد حايخبط في السلك اللي قبل القناه .
    - ــ كنا طايرين ولا لما نكون بنزحف بالطيارات .
- ــ الواد طلال رقع الصواريخ بتاعته والعساكر بتاعتهم بتجرى ناحية الرادار .
  - ــ كانوا بيجروا لقضاهم .
  - \_ بس النقيب محمد قومندان بصحيح .
  - \_ أنا ما شفتش الصاروخ اللي بتقولوا عليه ده .

وفى خضم هذا كله ألابد وأن أنسحب من بين هؤلاء السكارى المنتشين بنصرهم الذى ذاقوا حلاوته . . فتوجهت إلى مكتبى فى مبنى السرب وأنا أكاد أطير زهوا . . وانتهيت من إبلاغ القيادة بنتائج الطلعة . . وكان وقت الغروب قد حان ، فخرجت من الغرفة ناظرا فى الأفق إلى لا شىء ، أسترجع ما حدث . . وبعد لحظات فوجئت بقنديل يقبل على ولم أكن قد شاهدته بعد الطلعة . . واحتضننى قائلا :

- ــ حمد الله على السلامه يافندم . . صور الأفلام بتقول ان النتايج ممتازه . ثم وضح الانفعال عليه ، وأدار وجهه ليخفى دمعة .
- \_ أنا كنت خايف قوى يانقيب محمد . . مع إنى كنت هنا على الارض .

## نبدأ وامر .. رقم

- \_ قول اسمك مظبوط يا تحفه .
- \_ ١٠٦٥ طالب مستجد أحمد على الشناوي يافندم .
- \_ كل واحد يكتب رقمه على المهمات بتاعته . . 20 يوم فترة اختبار . . الفصيله ٣ السريه ٦ . . نوبة صحيان الساعه ٦ صباحا . . الدفعه ٤٢ . . الزياره من ١٠ \_ ١٠ . . ٢ طابور زياده . . اختراق ضاحيه ٨ كيلومتر . . الشعر محلوق غره ٣ . . طالب غره ٣ في الصف الأول بلاش حركه . . خدمه على البوابه من ٢ \_ ٨ . .
- ـ بند أوامر رقم ٧٦ تصدق لطلبة الدفعه ٤٤ بأجازة ٥ أيام اعتبارا من . . . مدرج ٨ . . المحاضرة الثالثة تكتيك . . مواجهة الفصيلة ١٠٠ متر في الهجوم . . الكتيبه تحتل مواقعها في ٢ نسق . . السريه ٩٠ فرد . . معدل السير ٢ كيلو متر في الساعه . . تمرين نمره ٢ خمسين مره . . دورية سير ٣ أيام . .
  - ــ بند أوامر رقم ٢٣٢ تقرر ترقية الطلبة الأتية أسماؤ هم إلى . .

ألف مبروك يا أحمد النجاح . . ٤ شرايط على دراعك . . من أقدم ١٠ على الدفعه . . عبور ميدان الموانع في ٧ دقيقة ٥ أيام حجز قشلاق علشان السريه متأخره . . دروس حرب ٥٦ . . حفل تخرج الدفعه في قاعة ٢٣ يوليو . . كل خريج ٢ مدعو فقط . . في الترتيب العام ١٢ في التكتيك الاول . . رغبه أولى الصاعقه . . أجازه ٧ أيام . .

ــ تسلموا نفسكم للوحدات ٢٠/٧/٢٠ .

\_ حمد الله على السلامه ، وأهلا بكم في الكتيبه ٢٥ صاعقه .

\_ بند أوامر رقم ٣١٥ تقرر انضمام كل من الآتي أسماؤهم بعد إلى ك ٢٥٠ صاعقه اعتبارا من . . .

نوبة صحیان الساعه ٥ . . ٨ لفات حو المعسكر . . دوریات قتال ٣ أیام . . القفز من ٢٠ متر فی المیه . . مجموعات اقتحام ١٢ فرد . . ٢ یوم دوریة إعاشه بدون اكل أو میه . . تجدیف ٤٣ كیلو متر مع الهجوم ٣ مرات فی الطریق . . المرتب م ٢٨ جنیه . . استمارة ٧ عللعساكر . . مصر الجدیدة تركب خط ٤ . . نوبتجیه كل ٦ أیام . . ٢ یوم مبیت علشان التدریب اللیل . .

\_ تفتكر بعد عشر سنين حاتفضل تحبني كده ؟

\_ لو بعد میت سنه برضه یا ناهد حا احبك . . نفسی لما نتجوز نخلف ٣ صبیان .

بند أوامر رقم ٤٣٢ تتحرك الكتيبه ٢٥ بصاعقه إلى اليمن . . تمام الاستعداد للتحرك الساعه ٢٠٠٠ يوم ٢٠/٩/٢٠ . . ٢٤/٩ كيلو متر من القاهرة . . جبل صرواح ٢٠٠٠ متر من سطح البحر . . الموقع يحتاج إلى أكثر من ٥٦ عسكرى . . لا من ٢ عساكر خدمه مستمره لحماية مخزن الذخيره . . تمام يافندم اللاسلكى على قناه ٧ . . اسمعك بقوة ٤ على ٥ . .

\_ المتسللين اليمنيين بيهاجمونا بقالهم ٣ مرات .

\_ لازم نهاجم احنا المره دى يافندم .

الهجوم بعد منتصف الليل بـ 20 دقيقه . . ٢ طلقه كاشفه للمدفعيه المعافنة . . كل عسكرى ٣ خزنة طلقات . . الفاصل ٢٠٠ متر بين كل فصيله والثانيه . . المدفعيه توقف الضرب بعد ٢٢ دقيقه . . القوه صغيره على الهجوم . . قدامنا ٢٠٠ متسلل يمنى على الاقل . . نجده من السريه ١٩ . . حاصرونا من ثلاث جهات . . الضرب علينا شديد . . الفجر بعد ٣ ساعات . . لو استحملنا لغاية الفجر حانخرج من الحصار . . يارب ميت ركعه لو طلع علينا النهار . . النجده وصلت قبل الميعاد بـ ٣٠ دقيقه . . هايل ، الف حمد وشكر لك يارب .

- \_ أصل الشقه لازم تكون ٤ وصاله .
- ــ الراجل عايز ٣٠٠ جنيه مقدم ، حايبقى فاضل معايا ٢٠٠ . . نعمل الفرح في ٢/٢ .
- \_ بند أوامر رقم ١٥ تصدق للنقيب أحمد على الشناوى بأجازة ٧ أيام اعتباراً من . . السرية الأولى على كل سرايا الصاعقة . . مجهود ممتازيا أحمد ، بعد كام يوم لك عندى خبر كويس . .
- ــ بند أوامر رقم ٢١٥ تعين النقيب أحمد على الشناوىقائداً للسرية ١٧ اعتباراً من . .
- \_ استلام ۹۳ بندقیة آلیة ۳۰۰ عربة جیب ۸۰۰ عربه نقل جنود . . . ۹۱٤٥ طلقه . . ۳۶۸۰۰ جنیه عهدة السریه . . ایصال استلام رقم ۱۹۲ . . غاذج ۱۰۸۰ خاصه بالتحرکات . .
  - ــ أحمد . . السريه تكون جاهزه للتحرك بعد ٤٨ ساعه .
- ــ بند أوامر رقم ٦٣٤ تتحرك السريه ١٧ إلى ممر متلا والتمركـز عند الكيلو ٣٧ . . تمام الاستعداد الساعه . . ٦ يوم ١٧ مايو ١٩٦٧ .

عبور القناه الساعه . . ٤ . . التحرك قول طريق ٨ عربات ، ٢ هاون في كل عربه . . احتلال التبه ١٤٥ . . كل فصيله ٢ عساكر خدمه ٢٤ ساعه . . اسرائيل على بعد ٢٠٠٠ كيلومتر . . ١٨ يوم في الطوارىء دى ومش باين أى حاجه . . زيارة القائد العام للوحدات يوم ٥ يونيو . .

ــ بند أوامر رقم ٦٨٤ وصول عدد ٧٧ جندى احتياط يوم ٣ يونيو ١٩٦٧ الاستعداد لزيارة القائد العام الساعه ٩٠٠ . . الهجوم على ١٠ مطارات مصرية . . اسقاط ٨٦ طائره اسرائيليه خلال ٤ ساعات . . الإنسحاب غرب القناه الساعه ١٩٠٠ يونيو . . قرار الامم المتحدة رقم ٢٤٢

- ــ أحمد . . موقف السريه ١٧ إيه ؟
- ــ نسبه الاستكمال في السريه ٥٦ ٪ عندى شهداء كتيريافندم .
  - \_ بند أوامر رقم ٧٦٣ استشهد الآتي أسماؤهم بعد . .

التحرك بالقطار ٥٤٧ . . التمركز ٩ كيلو متر شمال الاسماعيليه . . اسرائيل خدت ٢٠٠ كيلو وبقت على بعد ١٨٠ متر . . قصف جوى على السويس ٣ ساعات . . مستوى السريه في التدريب ٦٥٪ . . اعادة اختبار للسريه بعد ٥٥ يوم . .

- ــ بند أوامر رقم ٦٢١ تصدق باجازه ٢٤ ساعه للنقيب أحمد على الشناوى :
  - ــ ياوالدى اجنا نقدر نهزم اليهود والله العظيم .
  - \_ يابني انتم قدامكم ٢٠ سنه على ماتقدروا تحاربو تاني .
    - ــ معقول يا عمى حانقعد ٢٠ سنه في الحال ده ؟
      - ـ يابنتي ياناهد الانجليز احتلونا ٨٠ سنه .
- ـ بس إحنا يا بابا مش حانعمل زيكم ، مظاهرات ومفاوضات وبس ، إحنا كلها سنه والا اتنين ولازم تقوم حرب تانى مع اسرائيل . . يا بابا إحنا ما حاربناش فى ٦٧ .
  - ــ خلاص يا أحمد انقل نفسك في حته قريبه بقى ما دام الحكايه حاتطول .
    - ــ من فضلك يا ناهد الموضوع ده بيضا يقني ومش عايز هزار فيه .

نسبه استكمال المعدات ٨٥٪ . . ٣ طابور نهارى + ٣ ليلى . . معقول حانقعد ٢٠ سنه لما نحارب تانى . . ٩ مارس زيارة الفريق عبد المنعم رياض للجبهه . . اشتباك بالمدفعيه ٥ ساعات . . استشهاد الفريق رياض . . تعليمات عمليات المتباك بالمدفعيه ٥ ساعات . . استشهاد الفريق رياض . . تعليمات عمليات الروح ١٩٠٦ . . عبور ضابط و ٨ عساكر للضفه الشرقيه للقناه والعودة لرفع الروح المعنوية . . الفصيله ٣ تقوم بحماية مجموعات العبور . . استدعاء لمكتب قائد الكتبه .

السريه بتاعتك تجهزيا احمد لعملية عبور حقيقى واشتباك مع اليهود . . مطلوب احضار ٢ ـ ٣ أسرى من النقطه القريه اللى فى نمره ٣ . . قدامك ٣ ايام تجهز نفسك ، وتعرض على خطتك بكره الساعه ١١ .

ـــ المدفعيه بتاعتنا حاتعمل لكم ستارة نيران شرق القناه على بعد ٠٠٠ متر من موقع الهجوم ، حانبدأ الضرب بعد البلاغ بانتهاء العمليه بـــ ٣ دقائق .

- ــ حا اطلع بند أوامر للتمويه يافندم .
- ــ بند أوامر رقم ٦٩٤ يتم تحرك السريه ١٧ إلى انشاص اعتبارا . . .

ساعة (س) ٣ صباحا . . مجموعة الاقتحام الاولى معايا والتانيه مع حسن الغمرى المجموعات الساتره مع حسين . . مطلوب ٤ قارب + ١ احتياطى . . الموجود ٤ نضارة رؤية ليليه ، بس مش مهم . . من كل مجموعة اقتحام ٣ مخصصين علشان الاسير . . الليله ١٢ عربى والقمر حايساعدنا كتير .

- \_ أول ما ترجعوا بالسلامه حاتلاقوا الشاي جاهز وعلى حسابي .
  - ــ تصور یافندم بتاع دمیاط حایمزمنا علی شای !
- ـــ الساعه دلوقت (س ۲۰ ) . . توكلنا على الله يا رجاله . . الدوريه الاسرائيلي ٣ دبابات ، اوعى حد يظهر قبل الثلاث دبابات ماتعدى .

فاضل 20 دقيقة على الهجوم . . والذي كان بيقول حانحارب بعد ٢٠ سنه . . القرار ٢٤٢ . . الليله حفلة أم كلثوم وطبعا اليهود فاهمين إن إحنا بنسمعها دلوقت . . أول مرة حانشوف اليهود بتوع ٣٠ . . قانوا عليهم الجيش الاسطوره . . طول عمرى من ٢٠ سنه وانا نفسى أكون ظابط صاعقه . . الوقت طويل قوى . . الناس كانت بتقول علينا نكت من سنتين . .

ـ بص بالنضارة ، شایف الواد اللی قاعد بیسمع الرادیو ده . . حاتبتدی بیه یا اسماعین ، اذا جه معاك كان بها وإذا عصلج یبقی تخلص علیه ، ومن غیر صوت .

#### \_ حاضر يافندم .

حد يصدق إن إحنا على أرض سينا تانى . . حسن الغمرى ظابط هايل بس أنا خايف عليه من اندفاعه . . صوت الدبابات ابتدا يظهر . . ندر على لو العمليه نجحت ١٠٠ ركعه يارب . . الدبابات بتمشى بفاصل ٥ دقائق . . الله يرحمك يا أمى طول عمرك كنت خايفه على من حكاية الصاعقة . . وحشتيني قوى . . دى آخر دبابه في الدوريه . . يارب دى أول عمليه ضد اليهود ، يسر ولا تعسر يارب . .

- \_ دقيقة يا حسن وتبتدى .
  - \_ حاضر يافندم .
- \_ خلليك ورا اسماعين ١٠ خطوات ياعراب ، تحميه لغاية مايوصل للدشمة .
  - \_ يافندم حافظين كل حاجه .
    - ــ ياللا يارجاله .
  - \_ سليمان وهاشم اوعوا حد يخرج من باب الدشمه .
    - \_ كتفه يااسماعين ، ينصر دينك يابو السباع .
      - \_ يانقيب حسن الدشمه صحيت .
        - ـ القنابل ياسلامه .
    - \_ دب صباعك في عينه ياعرابي ، يبطل صريخ .
      - \_ بطل الرشاش بناعهم اللي في اليمين ده .
    - \_ مبروك يا فندم النقيب حسن جاب أتنين منهم .
      - \_ بسرعة يا حسن على القارب .
      - \_ اسماعين الراجل بتاعه مغمى عليّه .
    - \_ شيلوه بسرعه وعلى القارب ، معاهم يا برعى .
      - \_ فیه صوت دبابة جایه ، سامعه یا فندم ؟
      - العمليه كده تمام ، ياللا يا رجاله على القوارب .
- ــ الو اسد . . الو اسد . . الرق ٢٠ العمليـ تمام ، متجهين للقوارب .
  - \_ يافندم . . الدبابه شمالنا اهه ، • ٥ متر تقريبا .
    - \_ سليمان وهاشم خليكوا معايا والباقي يكمل .
- - \_ الحق ياسليمان النقيب أحمد انصاب .
- ــ الحمد لله المدفعيه بتاعتنا ابتدت اهـه ، الدبـابه رجعت ورا التبـه اللي في الشمال .

- شيل معايا يا هاشم ، بسرعه .
  - ــ سلامتك يافندم .
  - ــ الباقيين . . رجعوا .
- ــ القوارب كلها رجعت يافندم فاضل القارب بتاعنا ، وادى احنا خلاص اهه على حرف المه .
  - ـ بسيطة انشاء الله يانقيب حسن . .
- بسرعه حدينده للدكتور وعربية الاسعاف . . يا حبيبي يا أحمد ، من واحنا طلبه في الكلية ما سيبناش بعض .
- ــ ایه یا اسماعین ، ده وقت عیاط . . بسرعه حطوه فی بطانیه وعالمستشفی ، وانت اطلع معاه یا حسن .
  - ــ حسن . . . الباقيين . . رجعوا . . .
- كلهم رجعوا يا أحمد ، والعمليه نجحنا فيها ١٠٠ ٪ ... انت بس استريح القمر استخبى في السحاب . . المسافه للمستشفى ٢٠ كيلو متر . . الاخر الاكبر لاربع اخوات بنات . . سرعة العربه ٧٠ . . فات ٢٣ شهر على حرب ٢٠ . . القتلى اليهود ٨ على الأقل و٣ أسرى . . السريه كان عندها اعادة تفتيش بعد ٨ أيام لان مستواها كان ٢٥ ٪ . . النبض ٤٥ في الدقيقة . . زود السرعه خليها ١٠ . . المدفعيه بتاعتنا اتأخرت ٣٠ ثانيه في الضرب . . يارب . . كوباية الشاى ١٠ . . البرد جامد قوى . . النبض ٣٠ . .
  - ــ انت يا حسن اللي تبلغ أهله لإن برضه انت كنت صاحبه وعارفهم .
    - ما تنساش تعمل شهادة برقم الرشاش اللي سابوه هناك .

شهادة وفاه رقم ۲/۸۳۲ . . محضر جرد عهده شخصیه رقم ۲۳ . . نموذج عملیات رقم ۱۵ . . سرکی معاش رقم ۱۷٤٤ / مراجمالی المبالغ المستحقه للورثه ۲۱۵۰ جنیه . .

#### الوجه الاخر

كانت الشلة مجتمعة فى نادى الجزيرة منذ الصباح ، وسامح لا يغادر حمام السباحة إلا ليلتقط بعضاً من الطعام أو المشروبات ، ثم يعاود الكرة هاربا من حر يوليو اللافح ، ومن بعض أفراد الشلة الذين أصبحوا على النقيض معه فى أمور شتى .

- ـ عارف بقى لنا قد إيه في الميه ؟ . . أكتر من ساعتين .
- ــ يا ستى هو احنا ورانا حاجه . . احنا جايبن علشان نتفسح . . والميه من ألذ مايمكن .
  - ــ لا . . ياللا نطلع بقى أحسن زهقت .

ولم تنتظر هناء موافقة سامح زوجها ، وإنما خرجت من حمام السباحة مباشرة إلى غرفة تغيير الملابس ، ولم يجد سامح بدأ من موافقتها فتبعها راضخا . وبعد دقائق كانا قد انضها للشلة في الكافتريا .

- \_ البرنامج بالليل ايه يا جماعه . . ؟
- ـ تيجوا نطلع المقطم فيه فرقه هايله . . ايه رأيك يا سامح .
- ـــــ لا ، لا . . الليله في الاوبـرج ، ومفيش اعتذار من أي حــد . . المقابله الساعه عشرة هناك .
  - وهتف أفراد الشلة جميعا .

\_ أوكى !

وانفرط عقد الشله على وعد بلقاء في المساء . . وما أن وصل سامح وهناء إلى عربتهما ، حتى عاجلته بكلماتها المنفعلة باندفاع كأنه طلقات المدفع .

ــ ايّه بقى ، مش عايز نسهر كمان الليله دى ليه ؟ . . يعنى مش كفايه قاعده لوحدى طول الشهر ، يبقى حتى الليلتين اللي بتيجي فيهم مش عايز نتفسح .

\_ يا حبيبتى ما احنا سهرنا امبارح مع إنى كنت جاى من السفر ، والنهارده أهه في النادى ، ومع الشله برضه ، فيها إيه لو قعدنا النهارده في البيت ، عربية الشغل حاتعدى على خمسه الصبح .

\_ يا سيدى اسهر اللّيله دى ولما ترجع الشغل ابقى نام زى ما انت عاوز . ونظر إليها في سخرية .

هو أنا باروح الكتيبه علشان انام . . طيب .

ثم ضغط على نفسه حتى لا يزيد حدة الخلاف ، خاصة وهو يشتهى جسدها ، فهو لم يشبع من معاشرتها بالأمس أو هذا الصباح . . وكيف يشبع وهو بعيد عنها طوال شهر كامل .

\_ خلاص يا ستى حانسهر الليله ، ولا تزعلى نفسك

واجتمعت الشلة في الاوبرج وقضيا وقتا صاخبا حتى الثالثة صباحا ، وفي طريق العودة اقترح عليها سامح أن يتمشيا على النيل ، خاصة وانه لن ينام حتى ميعاد السفر الذي بقى عليه ساعتان .

\_ يا هناء يا حبيبتي لازم تقدري ظروف شغلي .

\_ يا سامح انت اللي لازم تقدر . . واحد ييجى لمراته يوم واللا اتنين بالكتيركل شهر يبقى عايز تقعدهم في البيت كمان . . وبعدين أنا مش عارف الظروف دى حاتخلص امتى .

ـ لما الحرب تخلص .

واندفعت بحدتها المعهودة .

ـــ وأنا مالى ومال الحرب . . انت عارف احنا قعدنا مع بعض قد ايه ؟ . . يا دوب شهرين وطلعت لنا ٦٧ . ومن يومها وأنا مش عارفه ان كنت متجوزه والا

وكان هذا هو محور الحديث المكرر والمعاد الذي يدور بينهما في كل أجازة يأتي فيها سامح إلى القاهرة . . وشعر سامح بمدى انفعالها واندفاعها فحاول إسكاتها برقة فوضع ذراعه حول كتفها ومال برأسه عليها .

يا هناء يا حبى فيه حاجات مش فى ايدينا نغيرها . . ما أقدرش أقول النهارده أنا مش حاحارب علشان مراتى قاعده لوحدها أو زهقانه من الوضع ده . . وبعدين كل الظباط على الحال ده .

ـ يا سامح أنا يوم ما اتجوزتك كنت في مصر وقلت انك مهندس وشغلك هنا على طول . .

وقاطعها حتى لا تسترسل فى افساد اللحظة الشاعرية التى يحاول الامساك بها . ــ من فضلك ، ظابط مهندس . . وبعدين هو احنا كنا عارفين إن حايحصل ٦٧ دى ، وان البلد كلها حاتتشقلب .

وبْقدر اشتياق سامح إلى زوجته وجسدها الشهى طوال الشهر الذى يقضيه فى الجبهة ، بقدر ما كان يعود من اجازته والخلاف بينهما على أشده .

ــ ماتكلم أونكل عبد الرحمن وهو ينقلك مصر فى دقيقة ، هو مش لواء ونائب الوزير على طول .

يا هناء الموضوع ده اتكلمنا فيه قبل كده ، وقلت لأ يعني لأ .

ــ يبقى انت مش عايز تقعد معايا بقى . . قول كده .

ويعود سامح إلى الكتيبة من اجازته وهو يحمل هموم الدنيا بسبب كلمات زوجته التي لا تشعر بشيء حولها ، سوى انها تريده بجانبها .

ـ يا ستى الموضوع موضوع مبدأ ، وانا مقتنع بانى فى الجبهه ، ومش عايز أجى مصر ، يا هناء أنا حاسس ان هناك فى القناه باعمل حاجه .

- طيب ماتعمل الحاجة دى وانت في مصر ، واللافي مصر مابيعملوش حاجه . - ياستي اللي في مصر بيعملوا ، بس لما كلنا نيجي مصر مين حايقعد في الجبهه ؟ ــ يعنى انتوا قاعدين فى الجبهه علشان تحاربوا صحيح ، أهو كُلام جرايد . . طول النهار يقولوا استنزاف وغارات وادى احنا زى ما احنا بقى لنا سنتين وزياده . وهنا انفجر سامح ثائرا وكأنه ينفث غضباً مكتوماً من سنين .

ــ يا هانم ده مش كلام جرايد . . دى حرب شغاله ليل ونهار ، فيها نــاس بتموت وناس بتتعور . . لكن للاسف اللي زيك مايعرفش احنا بنعمل ايه هناك .

\_ وايه الفايده من اللي بتعملوه ده .

وشعر بأن كلماتها الثلجية تنقلب في داخله إلى جمرات من النار .

ــ الفايده يا هانم ان الناس اللي في مصر دى كلها بتنام وهي مش خايفه على نفسها ، الفايده ان المدارس شغاله عادى ، الفايده ان المصانع لسه بتنتج والفلاحين بتزرع . . الفايده ان حضرتك وشلتك بتقدروا تروحوا النادى وتسهروا في الاوبرج ، عرفتي ايه الفايده من اللي بنعمله .

وشعر بأنه افرغ بعضاً من غضبه ، وان كان مازال فى ذاخله الكثير ، ولكنه لا يبوح به . . لكن شدما ادهشه بعد هذا الشجار ، ان هناء لم تصبح شهية فى عينيه كما كان يراها من قبل . . بل ان معاشرتها ليلة السفر لم تشعره بأية متعة كما تعود من قبل . .

ومرت الأيام خاطفة سريعة ، مشحونة بالعمل الشاق من تدريب إلى تجهيز وتفتيش على معدات وأفراد الكتيبة ، وفي المساء يعود إلى الخندق المدفون تحت الأرض وسقفه قضبان حديدية مقوسة على شكل نصف دائرة مغطاه بشكائر الرمل ، حتى أصبح الاسم الدارج للخندق « قفص القرد » . . ولانه قائد الكتيبة الهندسية فقد كان خندقه يتميز بكنبة وفوتيه خشب بجوار السرير بالاضافة إلى ترابيزة عليها التليفون . . وفي اليوم السادس أشتاق إلى ان يكلم هناء بعد أن ذبل غضبه منها . .

- \_ الو . . واحشاني يا هناء . .
- ـ حاتنزل امتى يا سامح ؟ . . وفكرت في موضوع اونكل عبد الرحمن ياترى ؟
  - \_ قلنا بلاش كلام في الموضوع ده . . انت اخبارك ايه ؟
- ـ باقولك ايه . . عيد ميلادي بعد ٨ ايام وعزمت العيله كلها واصحابنا ،

اوعى تقول مش حااقدر انزل اجازه .

ــ لسه بدری ویجلها الحلال ، انشاء الله یومها حاحاول آخد إذن ست ساعات ، وکل سنة وانت طیبه .

- ــ يعنى لو نزلت قبلها بيوم حاتتهد الدنيا
- \_ طيب ، طيب . . انا عايز اطمئن عليكي ، انت عامله ايه ؟
  - ـ عايشه . . يعنى حاعمل ايه .

وانتهت المحادثة على غير ما كان يبغى ، بل انها نكأت جراح الاجازات ، وايقظت فى نفسه الهموم السابقة التى كان يتجرعها فى كل شهر من هناء . . فاستلقى على السرير بالأفرول مغمض العينين ، واخذ يستعرض شريط حياته مع هناء منذ ثلاث سنوات هى عمر زواجها ، إلى أن غلبه النعاس .

وهب من نومه مذعورا ، لكنه تمالك نفسه في ثوان معدودة ، فقد ايقظته صفارة الانذار معلنة عن غبارة اسرائيلية ، وكان الجميع قد تعود على تلك الغبارات فاصبحت لا تهز فيهم شيئا . . ودس قدميه في الحذاء واندفع إلى سطح الارض ، واخذ يتأكد بنفسه ان كافة معدات وافراد الكتيبة في الحنادق . . وفي دقائق كان يلقى بنفسه مرة اخرى تحت الأرض في الحندق المجهز كمركز للقيادة .

\_ صباح الخيريافندم ، الكتيبه عندى تمام .

ــ اهلا يا سامح ، اقعد أما نشوف حايخلصوا امتى ولاد الهرمه دول .

جاءت كلمات قائد الفرقة باردة متثاقلة من طول ما تعودوا على تلك الغارات ، خاصة وان كل دورهم هو تجنب قنابل الطائرات المهاجمة باللجوء إلى الحنادق تحت الأرض. .

- الضرب تقيل قوى النهارده يافندم .
- ــ منهم لله ، كان ورايا حاجات كتير قوى النهارده ، اهى عطله والسلام
  - ـ دى قنبلة ألف رطل ، انا ودنى ما تخيبش ابدا .
    - ــ امال . . خبره كبيره في قنابل اليهود .
      - ــ أمال الدفاع الجوى بتاعنا فين ؟

ــ قيادة الجيش بتبلغ أن الصواريخ بتاعتنا دمرت طياره .

ــ رشة سجاير يافندم تحيه للطياره اللي وقعت .

وانتهت الغارة الاسرائيلية وخرجوا جميعا من مركز القيادة ، وشمس النهار الساطعة تبهر عيونهم ، فقد كانوا مثل سجناء خرجوا من جب عميق .

وعاد سامح إلى كتيبته يملؤه حماس غريب ، واقبل على عمله بكل حواسه ومشاعره حتى انه لم يشعر بمرور وقت الغذاء . . وفي السادسة وقف مستندا على غطاء محرك العربة يتناول بعض السندويتشات ، مستمعا إلى راديو صغير كان يحمله في جيبه . . واندهش لمقدم احد الضباط ملهوفا .

\_ طالبين سيادتك عند قائد الجيش حالا يافندم .

وفى دقائق كان سامح يطرق باب مكتب قائد الجيش الثانى ، الذى كان فى انتظاره ومعه مساعد الوزير . فشعر سامح أن فى الأمر شيئاً على درجة كبيرة من الأهمية ، وأدى التحية العسكرية وقلبه يتوجس من سبب هذا الاستدعاء ، لكن قائد الجيش قدمه لمساعد الوزير بطريقة خففت من توتره كثيرا.

ــ الرائد سامح قائد الكتيبه ومن أحسن المهندسين اللي في الجيش . . اقعد يا سامح .

وجلس سامح وقد زالت رهبته وشحذ حواسه لكل ما سيقال .

ـــ شوف يا سامح ، فيه مهمه خاصه على درجه كبيره من الأهمية والسرية ، واخترناك انت لها ، علشان متأكدين ان انت حاتنفذها على أكمل وجه .

والتقط سامح النوتة الخاصة به ليدون كل التعليمات .

\_ تحت أمر سيادتك .

ـ الغاره اللى حصلت النهارده الصبح المخابرات والاستطلاع اكتشفوا ان كان مقصود بيها مخازن وقود الصواريخ اللى فى التل الكبير . وطبعا لوكانوا ضربوها كانت بقت كارثه ، لأن ده المخزن اللى بيمون صواريخ الدفاع الجوى كلها اللى فى الجبهه . . فاحنا قررنا ننقل الوقود ده لمكان تانى ، والنقل يبدأ الليله ، المكان الجديد عند الدشم الخرسانيه اللى بعد بنها بحوالى عشرين كيلومتر .

وتدخل قائد الجيش في شرح المهمة وسامح يكتب معظم ما يقال .

\_ دلوقت انت تحت قيادتك ٢٨ جرار ومعاهم ٣٠ سوأق ، والخزانات بتجهز دلوقت ، أوامر التحرك جاهزه وحاتا خدها وانت ماشى دلوقت ، ومعاك ٤ ظباط مساعدين لك ، والعساكر علشان التفريغ في بنها جاهزين . . التحرك من التل الكبير لغاية الزقازيق لازم يكون بالليل ، والمده المحدده للنقل ١٠ أيام من دلوقت .

وتدخل مساعد الوزير قاطعا الأوامر التي يتلقاها الرائد سامح .

\_ بس أنا متأكد إن سامح حايقدر يخلص المهمه في أقل من ١٠ أيام .

\_ ربنا يسهل يافندم .

\_ عموما كل يوم بدرى عن العشره تاخده اجازه يا سامح .

ونهض سامح مسرعا بعد أن استفسر عن بعض التفاصيل ، وعلى الفور اصطحب الضباط المساعدين واتجه إلى مستودع الوقود . . وفي طريقه إلى التل الكبير استرجع كل تفاصيل المهمة المكلف بها وطريقة التنفيذ ، وتوجس في نفسه من أن يفشل في التنفيذ ، خاصه وأن المدة المحددة كانت حرجة للغاية والسرية المطلوبة كانت تؤرقه . . لكنه شعر في داخله بزهو وارتياح أنه اختير لهذه المهمة .

وفى التل الكبير اجتمع بكل المشاركين فى تنفيذ المهمة ، وشرح لهم ما هو مطلوب منهم ، ودرجة أهمية العمل المكلفين بتنفيذه . . وسعد بحماس السائقين والجنود الذين طلبوا أن يكون العمل مستمراً وبأقل فترات راحة ، مما جعله يتقابل معهم فى تلك النقطه قائلاً :

ــ أنا عارف انكم قد المسئوليه ورجاله ، وانشاء الله حـانخلص قبل العشـر أيام .

وانقلب المستودع إلى خلية نحل ، الكل يتسابق في العمل ، والكل يؤدى واجبه ويساعد في أداء واجب الأخرين دون أن يطلب منه . . ومضت الساعات والكل يسابق الزمن لكى يتم التحرك قبل أن يبلج ضوء الصباح ، ونجح سامح ومجموعته في هذا . . .

وعلى الطريق وفي الظلام الدامس والصمت المطبق إلا من أصوات نقيق

الضفادع ، انطلق سامح بخياله إلى القاهره حيث هناء زوجته . . لابد وأنها تغط في نومها الآن ، وتقول إننا في الجبهة بلا فائدة . وأين كانت في المساء والكل هنا يلهث كي نتحرك في الظلام ؟ . . لابد وأنها في السينها أو في النادي مع الشلة . . ناس تشقى وتلهث وناس تحتار في كيفية قضاء الوقت .

ــ بعد إذنك يافندم نقف في الزقازيق علشان نصلي الفجر.

وانطلقت العربات بعد الصلاة ، وضوء الفجر يكتسح ظلام الليل أمامه ، ومع إشراقة الشمس كان الفلاحون منطلقين إلى حقولهم في همة ونشاط ، والقرى على الطريق نفضت عن نفسها الكسل ودبت في بيوتها الحياة والحركة . وكان لابد للعربات من وقفة كي يتناول السائقون بعضا من الطعام .

- حانقف في منيا القمح نص ساعه ، الناس تاكل لقمه وتشرب شاى .

وفى النهاية وصلت العربات إلى الموقع الجديد للتخزين ، وتكرر ما حدث فى التل الكبير ، الكل يتسابق فى سرعة تنفيذ عملية التفريع ، كى يسرع بالعودة لعمل النقلة التالية ، ورغم الشمس الحارقة التى أصبحت فى وسط السهاء تقريبا إلا أن العمل انتهى بأسرع ما توقع سامح ، فشعر بأن البداية تبشر بالخير وأنه سينجح .

لكن بتكرار العمل ليلا ونهارا بدأت المشاكل في الظهور ، فقد تعطلت بعض العربات ، وانحرفت إحداها عن الطريق كها حل التعب والإرهاق بالسائقين . . وأصبح يعمل حساب للثانية والدقيقة ، خاصة وأن الغارات الإسرائيلية على المنطقة اشتدت عنفا وضراوة .

ـ يافندم انا صاحى والله ، العربيه انحرفت منى علشان اللى طلعت لى منين مش عارف . . الشبورة تقيلة والجاموسة شفتها في آخر لحظة .

ــ كمل انت يا شاويش على ببقية العربيات علشان نلحق وقتنا وانا حاستنى لغاية مانطلع العربيه بتاعة صبحى .

واندفع الفلاحون من الحقول بمجرد ان طلب سامح منهم المساعدة ، وفي دقائق كان حوله مائة فلاح من مختلف الأعمار . . ولم يندهش سامح إلا مع شيوخ فوق الستين جاءوا يعرضون المساعدة أيضا . . وفي دقائق كانت العربة مكبلة بالحبال التي أحضرها هؤ لاء الفلاحون ، وبناء على تعليمات سامح بدأوا يسحبون العربة بكل

ما أتاهم الله من قوة ، حتى تصبب منهم العرق رغم رطوبة الصباح ، ونفرت العروق من الرقاب والسواعد حتى أخرجوا العربة أخيرا وأعادوها إلى الطريق ، وتنفس سامح الصعداء بعد هذه الساعة العصيبة . . لكن عاجلته دراما الحياه بلفتة عقدت لسانه ، حين وجد بعد كل هذا امرأه في الأربعين قادمة إليه وهي تحمل صينية عليها بعض من الخبز والجبن لكن بكميات كبيرة وتتبعها صبية في عمر الزهور تحمل صينية أصغر عليها أكواب فارغة براد الشاى . .

\_ اتفضل ياسى الاستاذ انت وزملاءك كلوا لقمه تصلب طولكم .

وانتفض قلب سامح من الانفعال والقشعريرة والعاطفة التي انتابته ، فقد شعر في كلمات المرأة البسيطة بحلاوة التعاطف الانساني والمودة . . وكادت دمعة تطفر من عينيه تأثرا من موقف الفلاحين الذين أخرجوا له العربة ثم زاد عليه موقف تلك المرأة . . ملأه إحساس بأن هؤلاء هم أهله وعزوته الذين يحارب من أجلهم هو وباقى زملائه في الجبهة .

وفوجىء فى اليوم الخامس من المأمورية بقـائد الجيش يـزوره فى التل الكبـير ليطمئن على سير المهمة بنفسه ويذلل له أية عقبات .

\_ يعنى مفيش أى مشاكل ؟

ــ الحمد لله يافندم المأمورية ماشيه كويس قوى . . وحـانخلص قبل الميعــاد انشاء الله .

\_ مش عايز أي عساكر زياده هنا أو في موقع التفريغ ؟

\_ لو سيادتك شفت الناس بتشتغل ازاى مش حاتصدق يافندم . . تصور سيادتك في موقع التفريغ الفلاحين بيقعدوا منتظرين بالساعات لغاية مانوصل ، وكل واحد يقدر يعمل حاجة بيعملها من غير ما نطلب منه أو يعرف احنا مين . . مجرد أنهم عرفوا أن احنا الجيش ، والله يافندم الستات يقولوا لي عايزين نعمل أى حاجة . . ده غير الاهالي في الطريق . . تصور يافندم كل يوم الفجر نلاقي الإكل والشاى نازل من بيوت الناس واحنا واقفين في منيا القمح ومن غير ما يسألوا احنا مين ولا بنعمل ايه ، لقونا كل يوم في نفس الميعاد بنعدى عليهم ، اتطوعوا يفطرونا كل

يوم . . علشان كده السواقين دى يافندم ماشفتش طعم النوم اكتر من ساعتين في اليوم ، لدرجة انى مش مصدق ان فيه بنى آدم يقدر يستحمل ده كله .

ده اللي انا كنت متأكد منه يا سامح ، ولكن عايزك تريح السواقين شويه علشان مش عايز أي حوادث . . وانت كمان لازم تستريح . .

وانصرف قائد الجيش بعد أن اطمأن على سير العمل ، وعلى الفور انطلق سامح الى مساعديه من الضباط والسائقين حتى يتجهزوا للتحرك في الموعد المحدد .

\_ اذا كان فيه حد تعبان يارجاله يقول ، احنا عايـزين المهمة تتم من غـير حوادث .

\_ احنا كويسين يافندم ومفيش اى حاجة وسيادتك ماتخفش كله حايتم مضبوط انشاء الله . . . وتوالت الرحلات بحماس وتفانى ومعدلات إنجاز أكبر مما كان موضوع فى الخطة التى كان يسير عليها سامح . . وانتعشت نفسه وأحس بنشاط دافق يتملكه فقد تأكد أن هذا المعدل من الأداء سيوفر يومين وسينجز المهمة فى ثمانية أيام فقط .

وفى اليوم السابع تعطلت إحدى العربات ، ولكى يتأكد من عدم ضياع أية دقيقة فى إصلاحها ذهب بنفسه الى مدينة بنها ليحضر قطعة غيار مطلوب تصنيعها فى أحد ورش الخراطة .

\_ نص ساعة ياكابتن وتكون جاهزة . . اتفضل استريح .

وجلس أمام الورشة بجتسى كوبا من الشاى ، ولمنح على بعند خطوات من الورشة السنترال الحكومي فخطر له أن يتصل بهناء .

- \_ أسبوع ما تفكرش تتكلم والا تنزل مصر . . كل مرة أخرج مع الشلة ابقى لوحدى .
  - \_ ياهناء عندى شغل مهم ومش فاضى .
  - \_ وياترى حاتفضي بكره علشان عيد ميلادي والا برضه الشغل ؟
    - \_ لأ ربنا يسهل وأقدر أنزل انشاء الله .
- \_ نفسى أعرف بتشتغلوا ايه إذا كان اليهود كل يوم غارات على الجبهة وانتم

ولا بتردوا عليهم ولا حاجة . . يبقى شغل ايه اللى مخليك قاعد عندك ؟ وشعر سامح أن صوتها فى التليفون كريه ولزج ويجعله يشعر بالغثيان

\_ طيب . . طيب . . كل سنة وانت طيبة .

وعاد إلى ورشة الخراطة مكتئبا صامتا ، وقد حاول الأسطى صاحب الورشة أن يتجاذب معه أطراف الحديث فكان يجيبه وهو يفكر في أشياء أخرى

- ... كام ياعم الأسطى ؟
- \_ ولا مليم ياكابتن . . هو احنا عملنا حاجة .

وطال الحوار بينهما وكل منهما يصر على موقفه إلى أن استسلم سامح في النهاية .

ـ لا شكر على واجب ياكابتن . . ده تبرع للمجهود الحربي . . أصل أنا ولا مؤ اخذه راجل كبير وما انفعش اروح الجيش ، لكن أخويا في الصاعقة عسكرى قد الدنيا . . ربنا انشاء الله حاينصرنا على أيد الكباتن اللي زي حضرتك .

ودعه صاحب الورشة في شبه مظاهرة . . . وما أن وصل إلى موقع التفريغ حتى وجد طاقم الفنيين في انتظاره ، وفي دقائق كان الجميع يتسابق لإصلاح العطل حتى تتحرك القافلة في أسرع وقت ممكن . . وكان باقى الموقع يعمل بلا هوادة والتفريغ على قدم وساق بواسطة الجنود والفنيين يساعدهم عشرات الفلاحين المتطوعين . .

وأقبل على سامح شيخ معمم يبدو من هيئته أنه من أعيان الفلاحين ، خاصة وأن خلفه يسير اثنان من الخفراء . وتبادل مع سامح التحية وكأنه يعرفه من فترة طويلة . .

- ــ أهلا ياباشمهندس . . أنا عمك شلتوت عمدة كفر شلتوت .
  - ب أهلا وسهلا ياعمدة .
- ـ لا أنا زعلان خالص . . . بقى تبقوا هنا جنب بلدنا بقالكم أسبوع واحنا ما نعرفش نقوم بالواجب معاكم . . . هو احنا بخلا ياباشمهندس . . . ده أنتم ولادنا برضه . . . واحنا ناس فلاحين نعرف الأصول برضه . . . أنا عرفت ان انت الريس بتاع الناس دى كلها . . . ما يلزمكش أيها مساعدة أو أى حاجة يعنى ؟
  - \_ كتر خيرك ياعمده . . . الناس هنا مش متأخرين عننا في أي حاجة . .
- على العموم أنا وزعت على العساكر الأكل بتاعهم وانت بقى غداك أهه .

وعلى الفور قام أحد الخفراء بتقديم لفة ضخمة واضح من حجمها أنها مليئة بخيرات الريف .

- \_ كتر خيرك ياعمدة ، بس أنا كلت والحمد لله .
- \_ تلاتة بالله العظيم لازم تاخده يعنى لازم تاخده .

ولم يجد سامح بدأ من قبول هدية العمدة ووضعها في العربة . . ثم فوجيء سامح بالعمدة ينتحى به جانبا بعيدا عن الخفراء والجنود ، ويدس في يده مبلغا من المال .

ــ أنا زى والدك يابنى ، والفلوس دى خليها معاك يمكن تحتاجها فى الطريق . وعقدت الدهشة لسان سامح وارتبك ، ثم فى لحظات استوعب مشاعر ذلك العمدة الطيب ، فقد كان يعرف من أقاربه الفلاحين أن إعطاء النقود للشخص هو قمة الكرم ، وتعبير عن المحبة . . لكن فى النهاية استطاع رد النقود للعمدة بعد عناء طويل .

وتمت عمليات النقل في اليوم الثامن وانتهى تفريغ القافلة في العاشرة صباحا . . فأصدر سامح أوامره بأن يستريح الجميع حتى الثانية ظهرا ثم يبدأ التحرك الأخير للعودة . وكان الجميع في أشد الحاجة إلى تلك الراحة بعد أن قضوا ثمانية أيام كاملة شبه مستيقظين والعمل مستمر ليلا ونهارا .

وتبدأ رحلة العودة الأخيرة ، والفرح يعم الجميع بعد أن تم تنفيذ المهمة بنجاح تام وفي زمن قياسى . وكان وداع الفلاحين لهم بعد أن عرفوا أنهم لن يعودوا مرة أخرى مثيرا للتأمل . . . فقد كان الجميع يصافحونهم ويقبلونهم وكأن بينهم وبين فلاحى المنطقة مودة قديمة ، بل إن النساء كن يطلقن زغاريدهن فرحة بهؤلاء الرجال . .

\_ ربنا ينصركم على أعاديكم .

وتحركت القافلة مشيعة بالدعوات والهتافات . . . رغم أن الجميع لم يكن يعرف

ماذا كانت تفعل تلك القافلة أو ماذا كانت تنقل . . . وانتاب سامح شعور طاغ بالوجد ، فقد تركت تلك المهمة في نفسه أشياء كثيرة . . . وترك سامح من روحه ومن نفسه قطعة في كل شبر من هذا الطريق . . , وانغرس في كيانه شريط حافل لن تمحوه حتى السنين . . عيون السائقين المجهدة وهي أشبه بكاسات الدم . . . منازل منيا القمح التي كان يخرج منها الإفطار والشاى . . . لم يعرف استمتاعا بطعم الشاي إلا من يد تلك الصبية عندما تعثرت إحدى العربات . . . الليالي الطويلة التي قضاها بلا نوم وذقنه التي طالت . . صاحب ورشة الخراطة . . . الفلاحون وهم يتقاتلون لرفع العربة التي الحرفت عن الطريق . . العمدة الذي أصر أن يعطيه النقود . . . وتذكر في هذه اللحظة لفافة العمدة وشعر وكأنه جوعان منذ عام . . . . وكانت سعادته غامرة حين وجد في اللفافة حماماً عشياً ، وقام باقتسامه مع السائق وأكل كها لم يأكل في حياته من قبل . . .

وقبل هبوط الظلام كان قد اغتسل وحلق ذقنه وتوجه إلى قائد الجيش ليبلغه بتمام تنفيذ المهمة شخصيا .

ـ برافویا سامح . . . الحقیقة مجهود عظیم اتعمل منك انت والناس اللی كانوا معاك . . . الكل مبسوط قوی من اللی اتعمل . . . وأنا بصفة شخصیة باشكرك ومقدر مجهودك واخلاصك . . وانت أثبت ان رأیی فیك كان فی محله . . . أرجو انك تستمر كده یاسامح .

\_ العفويافندم . . . أنا ما عملتش غير الواجب .

\_ أظن دلوقت يابطل نفسك تنام عشرين ساعة . . . بلغ المجموعة كلها أجازة ثلاثة أيام مكافأة لهم ، وأنت تاخد عربيتك وتنزل أجازتك على طول . . . وعايز أشوفك لما ترجع بعد الأجازة طبعا الكل حايجسدك على الأجازة ، لكن تستاهلها .

وانصرف سامح من عند قائد الجيش وهو سعيد بهذا التقدير الذي ناله . . . واتجه إلى مقر الكتيبة وسلم على الضباط ودخل إلى « قفص القرد » الخاص به واستلقى على السرير ثم نظر في ساعته فوجد أنها السابعة . واكتشف أنه يمكن أن

يحضر عيد ميلاد هناء زوجته ، لكن قفزت إلى ذهنه كلماتها عن الحرب خاصة المكالمة التليفونية الأخيرة . مما جعل رغبته فى النزول إلى القاهرة تفتر . . . واستمر مترددا بين أن ينزل إلى القاهرة أو يبقى إلى أن استسلم لرغبته فى النوم . . . واستيقظ فى الخامسة صباحا . وفى السابعة صباحا كان يدخل شقته فى القاهرة . . . وكما توقع كانت أثار الحفل فى أماكنها . . بقايا الطعام مازالت على البوفيه ، الأثاث غير مرتب ، الزينات تهدلت من السقف . . واستيقظت هناء ومكياج الأمس ما زالت بقاياه على وجهها .

ـ صباح الخير . . وكل سنة وانت طيبة .

ـ وانت طیب . . . ما کنتش قادر تاخد أجازه وتیجی امبارح . . . کان وراك ایه یعنی ؟ طیب ده کل أصحابنا کانوا موجودین ، وکانت بارتی تجنن وقعدتا سهرانین لغایة الفجر . . . ما أخدتش أجازة لیه بقی ؟

ونظر إليها نظرة باردة ولم يجد جسدها شهيا أو مثيرا كما تعود في المرات السابقة ، وخلع ملابسه ودلف إلى السرير لينام . .

ــ أبدا كان ورايا شوية شغل .

## القفص الطائر

اندفع طيارو السرب إلى استراحة الطوارىء متزاحمين على بابها الضيق بعد أن شاهدوا قائدهم قادما في عربته وبصحبته العقيد طلعت قائد اللواء الذين هم أحد أسرابه . . وفي لحظات انتظموا في جلستهم داخل الاستراحة يترقبون ما سيقوله قائد اللواء . . وقطع الرائد زكريا قائد السرب الصمت الذي خيم عليهم :

- \_ سیادتك تشرب شای ؟
- ــ لا قول للعسكري يجيب لي قهوة سادة في كباية .
  - والتفت إلى طياري السرب.
- \_ اللي عايز يشرب حاجة يطلب ، واللي عايز يدخن يتفضل .
  - وعلى الفور علق أحد الطيارين:
  - \_ أنا عايز أدخن يافندم بس معييش سجاير .

وضحك الجميع وخفف ذلك من الرهبة التي كانت تسود المكان . . وانطلقت أعواد الثقاب تطرقع في الهواء فقد كان معظم الطيارين من المدخنين .

- حاتكلم معاكم دلوقت على الطلعة اللى حانعملها بعد العصر . . الأوامر ٨ طيارات حاتهاجم موقع الهوك اللى طيارات حاتهاجم موقع الهوك اللى في رمانة وأربع طيارات حاتهاجم موقع الهوك اللى في بالوطة . . الرائد زكريا هو اللى حايتولى مهاجمة صواريخ الهوك وأنا قائد التشكيل اللى حايهاجم رمانة . .

واستمر العقيد طلعت لمدة ساعة كاملة يشرح تفاصيل الطلعة ويدقق المهام على كل طيار من المشاركين في الطلعة ويكرر الأوامر أكثر من مرة . . وكان سر هذا التكرار أنها المرة الأولى التي يشارك فيها طياروه الذين تحت قيادته في مهاجمة مواقع اسرائيلية فمنذ بدأت الحرب وهو يقود الأسرار الثلاثة التي تحت قيادته من على الأرض في غرفة العمليات . . لكنه في هذا اليوم تملكه شعور بأنه لابد وأن يكون معهم فوق المواقع الإسرائيلية .

وتخيل طلعت أن الطيارين يسودهم التوتر رغم أن جميعهم قد هاجم المواقع الإسرائيلية عدة مرات من قبل فأنهى أوامره وهو ويشعل سيجارة من العلبة الثانية رغم أن الساعة كانت ما زالت الواحدة ظهرا.

ـ ربنا معانا وحايوفقنا انشاء الله . . أي أسئلة ؟

وكان طبيعيا بعد هذا الشرح المطول والتلقين التفصيلي ألا تكون هناك أية أسئلة فانصرف الجميع خارج الاستراحة . . واصطحب العقيد طلعت زكريا وجلسا منفردين في منطقة مزروعة بالخضروات خلف دشمة إحدى الطائرات .

ـ زكريا انت حاتعدى القناة قبلى بدقيقة علشان أدخل أنا والتشكيل بتاعى بعد انت ما تكون دمرت الهوك . . عايزين نعمل نتيجة كويسة ومن غير خساير انشاء الله .

وكان زكريا قائد السرب يشعر بما يدور في نفس قائده من قلق وانفعال فأشفق عليه من عناء هذا الإحسّاس .

ــ يافندم مافيش داعى للقلق اطمئن . . والطلعة حاتتنفذ زى ما سيادتك قلت بالضبط ، الطيارين عندى في السرب ملتزمين قوى .

وشعر طلعت بأن زكريا يعرف ما يدور بداخله فأراد أن يتخفف من بعض ما يعانى خاصة وأن زكريا تربطه به مودة خاصة بعد أن خدم تجت قيادته خمس سنوات ، تولدت عنها صداقة شخصية بصرف النظر عن اختلاف الرتب والمناصب بينها .

ــ نفسى يازكريا الطلعة بتاعة النهاردة تجيب نتيجة كويسة . . أنا أصلى في حرب ٢٧ انضربت ومش قادر انساها لغاية النهاردة .

وقطع حديثهما أحد الضباط الإداريين فى السـرب الذى همس فى أذن زكـريا بشىء جعله يستأذن منفعلا وما أن ابتعد قليلا حتى سمعه طلعت وهو يهدد ويتوعد بصنوت عال ثم عاد إلى مجلسه وهو ينتفض من آثار ثورته .

- \_ ایه یازکریا فیه ایه ؟
- . . يافندم بنعمل أرجوزات علشان نحافظ على العربيات اللي في السرب . . وسواق غبى حرق موتور العربية علشان سايق من غيرميه .
- طيب هدى نفسك . . يدخل مكتب بكره ويتخصم عليه تمن الموتور . وانقضت الساعات الباقية على موعد الطلعة وانطلقت الطائرات في موعدها وماهى إلا عشر دقائق إلا وكانت الطائرات تعبر قناة السويس واطمأن طلعت لما رأى طائرات التشكيل زاحفة حوله في أماكنها تماما . . وفي الوقت المحدد على الخريطة ارتفعت طائرات التشكيل فوق الموقع الاسرائيلي وفي ثوان معدودة وبتعليمات منه انقلبت المنطقة إلى كتلة من الجحيم ، فقد اندفع طيارو التشكيل يقذفون المرقع الإسرائيلي بقنابلهم وصواريخهم المغلفة بحقد غريزي لكل ما هو إسرائيلي في الوقت الذي كان الموقع الإسرائيلي يبادلهم النيران من مواسير المدافع المضادة للطائرات وكأنها خراطيم لهب مستمرة .

وفى خضم نشوة الجميع بقرب نجاح مهمتهم بعد أن ساهدوا آثار النيران وقد بدأت تستشرى في الموقع . . جاء صوت العقيد طلعت في جهاز اللاسلكي :

ـ زكريا . . أنا انضربت فوق الموقع وراجع .

كانت طائرة طلعت قد أصيبت من طلقات المدفعية المضادة للطائرات مما جعلها ترتج بعنف شديد لكنه استطاع بخبرته الطويلة السيطرة عليها قبل ارتطامها بالأرض بأمتار قليلة . . وعقدت المفاجأة ألسنة الجميع ، وران عليهم الصمت للحظة حتى جاء صوت زكر با في جهاز اللاسلكي مندفعا كالطلقات :

- \_ خيريافندم . . الطيارة سليمة . . سيادتك فين بالضبط ؟
- \_ أنا بعدت عن الموقع حوالي خمسة كيلو متر وارتفاعي ١٠٠ متر .
- ــ انشاء الله سليمة يأقومندان . . نقيب صلاح يقود التشكيل ويرجع المطار

على طول . . وأنا حاطير حماية جنب سيادتك .

وجاء صوت العقيد طلعت حادا متماسكا:

\_ كل الطيارات ترجع . . مش عايز حد جنبى . . زكريا ارجع مباشرة على المطار .

كان ما دار فى خاطره أن الطائرات الإسرائيلية على وشك الوصول إلى المنطقة لاعتراض طائرات التشكيل ، والمهمة قد مجحت تماما ولا داعى لخسارة طائرة أو اثنتين من التشكيل فى قتال جوى غير متكافىء . خاصة وأن الوقود فى الطائرات يكفى للعودة فقط .

وانتبه طلعت إلى طائرته يتفحصها فوجد أنها تعمل بقدرة ضعيفة للغاية فأيقن أنه لن يصل القناة إلا بمعجزة .

ــ الطيارة فيها دخان في الكابينة ، لكن خفيف . . السرعة ٣٠٠ كيلو بس ومش عايزة تزيد . . المحرك تقريبا بيشتغل ٧٠٪ منه . . البوصلة عطلانة

ـــ يافندم خللي الشمس في وشك . . وسادتكم حاول تعدى غرب القناة ونط بالبراشوت ..

وعم الصمت في أجهزة اللاسلكي مرة أخرى ، فلم يكن في مقدور أي من طياري التشكيل الذين في طريق العودة إلى المطار أن يفعل له شيئاً . . حتى زكريا الذي امتثل لأمر العودة أيضا ، شعر في تلك اللحظة كم هو يحب طلعت ، لكن كلماته لم يكن لها فائدة تذكر .

وتملك طلعت إحساس مرير بالعجز ، فمصيره قد أصبح مرهوناً بما ستفعله تلك الكتلة الحديدية الطائرة . . شعر وكأنه مكبل بسلاسل غليظة وهو البعيد عن الأرض المحلق في الفضاء الرحب! . . المسافة إلى قناة السويس أربعون كيلو متراً . . سيمر فوق مواقع إسرائيلية وبسرعته هذه وارتفاعه هذا ستجهز عليه تلك المواقع بصواريخها ومدفعياتها . . وآه لو لمحته الطائرات الإسرائيلية القادمة لاعتراضهم ، سيكون صيدا سهلا لهم . . والبراشوت لن ينفتح إلا إذا ارتفع إلى ثلاثمائة متر ، فهذا هو أقل ارتفاع لفتح المظلة . . السرعة ثلاثمائة كيلو متر فى الساعة ولو تناقصت ثلاثين كيلو فقط ستهوى الطائرة إلى الأرض ، خاصة وأن

ارتفاعه مائة متر فقط . . يحاول أن يكسب بعض الارتفاع لكن الطائرة تتمنع ولا تستجيب وكأنها امرأة لعوب .

- \_ سيادتك فين دلوقت ؟
- \_ داخل على القناة كمان ثلاث دقائق .

يدعوربه أن يعبر القناة . . فهو لا يريد أن يهبط اضطراريا عند اليهود . . سيتم أسره دون شك . . والأسير انسان منزوع الإرادة رغم إرادته . . رتبته ومنصبه كقائد لواء جوى ستجعله مكسباً كبيراً لهم . . يمكن بوسائل التعذيب الحديثة أن ينتزعوا منه كل معلوماته . . الأسير يرجع بشخصية مختلفة تماما . . بناته الشلاث سيفتقدهن . .

\_ أنا فوق القناة بالضبط . . نفس الارتفاع ونفس السرعة ومتجه للغرب . تنفس بعمق وهو يرى لون الحقول الخضراء ممتدة أمامه والفلاحين يلوحون له بأيديهم . . وحاول مرة أخرى أن يكتسب بعض الارتفاع ، وانتفض قلبه في صدره وهو يرى الطائرة وقد بدأت تستجيب ببطء ، لكن فرحته ماتت سريعا حيث توقفت عن الارتفاع بعد ثمانين مترا فقط .

\_ تشكيل أسد على أرتفاع ٠٠٠ متر . . السرعة ٠٠٠ كيلو في الساعة . . الاتجاه ٢٣٠ درجة .

جاءت تلك الكلمات من أحد قادة التشكيلات العائدة من المعركة كى تعيد إليه الإحساس بالعجز وبصعوبة موقفه وهو مكبل في ذلك القفص الطائر ، لكن سخريته غلبته فهو على الأقل قد استبعد فكرة أن يكون أسيراً .

\_ معمد عاظالم وأنا نفسي معمر بس .

ومرت الدقائق بطيئة متلاصقة . وبدأت معالم المطار تظهر عن بعد فانتابه إحساس غامر بالطمأنينة ، فالطائرة ستصل إلى المطار ، وبدأ برج المراقبة ينادى علمه .

- \_. مكانك فين دلوقت يافندم ؟
- \_ حوالى م ١ كيلومتر من المطار وحانزل في المطار انشاء الله .

وعلى الفور أصدر زكريا الذي توجه إلى برج المراقبة فور هبوطه أوامره لعربة

المطافىء والاسعاف ومعها طبيب القاعدة أن يكونوا على أهبة الاستعداد لمواجهة أية عواقب قد تنجم بعد نزول الطائرة . .

واقتربت الطائرة فى خط مستقيم باتجاه الممر وأنزلت عجلات الهبوط وتنفس زكريا الصعداء فقد كان هناك شك كبير فى نزول تلك العجلات ، خاصة وأن الطائرة مصابة فى أماكن كثيرة . . وأقتربت الطائرة ببطء واضح لكن زكريا كان يشد من أزر طلعت بكلمات مطمئنة حيث المرحلة الأخيرة هى أصعب مراحل الهبوط . . وقبل بداية الممر بأمتار قليلة وكانت الطائرة على ارتفاع ثلاثين متراً تقريبا ، صرخ طلعت فى جهاز اللاسلكى :

\_ الطيارة بتحدف شمال ومش قادر أسيطر عليها . مفيش كونترول على عصاية القيادة . وفزع زكريا من هول منظر الطائرة وهي غير مسيطر عليها ، لكنه حاول أن يوجه طلعت إلى أي شيء قد يكون فيه نجاته وهبوطه سالما .

\_ استعمل الدفة اليمين . . الدفة اليمين .

لكن الوقت لم يمهل زكريا أو طلعت لعمل أى شىء فقد اندفعت الطائرة إلى الأرض الطينية الموجودة بين ممرات الهبوط . . وما أن لامست الأرض حتى أخذت فى الاندفاع تارة لليمين بعنف ثم ترتد إلى اليسار بأعنف ، وكأنها ثور أسبانى جامح ، والأجنحة ترتفع فجأة ثم تهوى فجأة ، كل ذلك وسط أتربة مثارة تحيط بالطائرة من كل جانب . . وأخيرا استقرت بعد مئات الأمتار من برج المراقبة .

واستشعر زكريا في نفسه أن طلعت لابد وأن يكون قــد استشهد فلم يحـاول الذهاب إلى مكان الطائرة ، وخرج إلى الخلاء ينظر إلى الأرض وهو غير مصدق .

ولم يشعر كم مضى عليه من الزمن وهو على هذه الحالة حتى فوجىء بطاقم برج المراقبة وهو يصرخ وينادى عليه . . فالعقيد طلعت كتبت له النجاة وهو حاليا فى الاستراحة الخاصة بالطيارين ولم يشعر زكريا إلا بأنه فى ثوان كان أمام الاستراحة واندفع كالصاروخ من بابها الضيق فوجد طلعت عمدا على أحد الأسرة المخصصة

لمبيت طاقم الطواريء . . ولم يشعر بنفسه إلا وهو يرتمي فوق طلعت وهو يبكي دون

وعي فياكان من طلعت إلا أن ربت على رأسه وقال بصوت واهن :

\_ أنا كويس يازكريا . . الحمد لله مفيش حاجة .

ونظر زكريا إلى قائده نظرة ملؤها الود والمحبة . . لكنه توجس فى نفسه حين الاحظ أن وجه طلعت ممتقع اللون بصورة شديدة فانتحى بالطبيب جانبا يسأله عن سر هذا الشحوب .

ــ هوكويس ومفيش أى حاجة الحمد لله . . ده بس من الصدمة العصبية وأنا أعطيته حقنه علشان أثار الصدمة . . لكن لازم ينزل المستشفى للاطمئنان .

وحاول طلعت أن يمشى على قدميه حتى يصل إلى عربة الإسعاف لكنه سقط على السرير . . فقام زكريا وبعض الطيارين بحمله إلى عربة الإسعاف وتمدد بداخلها . . واطمأن زكريا على راحته داخل العربة . . وقبل أن يغادرها أشار له طلعت أن يقترب منه ، فمال عليه حتى يسمع صوته الواهن :

\_ انت مكانى يازكريا لغاية ما أرجع . . وتخصم الموتور اللي اتحرق بتاع العربية على الواد السواق .

## عندما تنسحب الفهود

التاسعة صباحا والحر تلوح بوادره منذ الصباح الباكر ، رغم أن المكان مزروع بأشجار المانجو . . كانت كتيبة الصاعقة المتمركزة في تلك الحديقة غرب الاسماعيلية كاحتياطي لقائد الجيش قد انتهى أفرادها من أداء تمرينات اللياقة البدنية وتناولوا إفطارهم ، ثم انقسموا مجموعات متناثرة تحت الأشجار يمضون الوقت في نقاش دائم ، تارة جاد وكثيرا ضاحك وساخر .

- ـ بالذمة يارقيب تهامى ، حسنين ده منظره عسكرى صاعقة . . ده وزنـ ه خمسين كيلو .
  - ياعم الظاهر الحرب خلصت على كده .
  - ـ نفسى أرجع من الحرب الاقى الواد اسماعيل ابنى دخل المدرسة .
    - بيقولوا الطيران تباعنا شواهم .
- ـ شایف الرقیب حسن المصری ده . . مش طیب وساکت علی طول . . کنت تنفرج علیه أیام حرب الاستنزاف ، کان سبع بصحیح .
- ــ بقى الكتيبة بتاعتنا دى ما لهاش لازمه لغاية دلوقت . . يبقى الناس اللى قدام تمام قوى .
- \_\_ تصور أبوها طلب مهر ٢٠٠ جنيه ، قلت لأمى تبيع الجاموسة علشان أجوزها أول ما انزل .
  - \_ صبرى ده أيام الاستنزاف عض الواد اليهودى قطع له ودنه .

- ــ بقى أنت يابتاع الفنون الجميلة دماغك كلها رسم وألوان وتبقى عسكرى صاعقة . . غريبة قوى .
- ـ بس ياجماعة هس . . فيه بلاغ فى الراديو . . أسمع أنت وهو . . وفى خيمة الرائد شريف عبد السلام قائد الكتيبة كان بعض الضباط ملتفين حوله يقطعون الوقت فى مناقشة الوضع القائم تتوسطهم أكواب الشاى .
  - \_ يعنى كل اللي عملناه أن أحنا فطرنا رمضان .
- ـــ ياجماعة احنا تحت الطلب . . يعنى ممكن في ظرف سناعتين نكون بنشتبك مع اليهود .
- \_ أنا خايف سيادتك الحرب تخلص واحنا قاعدين احتياطي كده بنتفرج على الحرب .
  - \_ يعنى حانطلع نحارب من غير أوامر ؟
  - \_ لا يافندم بس قواتنا ما بشحركش من يوم ٩ أكتوبر .
  - \_ سيادة الوزير قال في البلاغ بتاع امبارح انها وقفة تعبوية .
  - \_ أيوه يانقيب صبحى بس اللي استفاد من الوقفة دى اليهود مش أحنا .
    - \_ كان لازم نكمل عليهم بعد العبور على طول .
  - \_ لا ياطارق أنا مختلف معاك . . الوقفة دى بتخللي دفاعنا ثابت وقوى .

واستمر الحديث بينهم بين مؤيد لوقوف القوات المصرية شرق القناة والتي مضى عليها أربعة أيام وبين معارض لها وأن القوات كان يجب أن تواصل تقدمها بعد العبور ولا تتوقف بعد خمسة عشر كيلو متراً من القناة . . وكان ما يجعل الجميع يشعرون بالضيق والتبرم هو أن الحرب قد مضى عليها حوالي أسبوع كامل وهم لم يشاركوا فيها بعد . وعند الظهيرة والملل قد حل على كثير منهم من طول المناقشات المعادة . . وعلى غير توقع تم استدعاء الرائد شريف إلى قيادة الجيش في الاسماعيلية ، وكان هذا الاستدعاء يبشر بأن هناك مهمة قد تكلف بها الكتيبة . . وفي ثوان وبدون اتفاق انقلب الجميع إلى حالة من التوتر والقلق ، مترقبين ما سيعود به الرائد شريف من أوامر وما أن دخل شريف مركز القيادة المدفون تحت الأرض ودى التحية حتى قام قائد

الجيش من مكانه على الفور ومعه اثنان من مساعديه واصطحبوه إلى غرفة جانبية جدرانها كلها مغطاة بأنواع كثيرة من الخرائط المرسوم عليها أوضاع القوات المصرية والاسرائيلية . وعلى الفور انطلق قائد الجيش يلقى بالمهمة على شريف الذى وقف متنبها لكل كلمة تقال :

\_ شريف . . سوريا اليهود ضاغطين عليها بقا لهم يومين . . علشان نخفف الضغط ده قررنا نطور الهجوم بكره الساعة سبعة صباحا بالفرقة المدرعة بتاعتنا . . العدوله دبابات متمركزة في الموقع ده . . مهمتك أنت والناس بتوعك ياشريف تدمير أكبر عدد ممكن من الدبابات دى .

وأكمل أحد مساعدي قائد الجيش بعد أن أشار إلى الخرائط:

\_ الدبابات متمركزة هنا بالضبط . . عددها ١٠٠ ـ ١٢٠ دبابة ، مطلوب تدمير أكبر عدد ممكن وتعطيل التحرك لغاية الساعة ثمانية صباحا على الأقل . . مفيش اتصال لاسلكي اطلاقا قبل الساعة سبعة والا اليهود حايكتشفوك .

\_ شريف العملية دى مهمة جدا . . لو دبابات اليهود اتحركت قبل الساعة شمانية الفرقة بتاعتنا حاتخسر كثير واحتمال التطوير كله يفشل . . أنا أخترتك انت بالذات لأنى عارفك من أيام حرب الاستنزاف . . على بركة الله .

واستفسر شريف عن بعض التفصيلات من قائد الجيش ومساعديه ثم انطلق وهو يسابق الزمن إلى كتيبته ، تفكيره مشغول بعشرات التفصيلات التي يشعر أنها تحاصره من كل جانب . . وأصبحت الساعات الباقية وكانها سياط تلهب عقله حتى لا يتأخر عن موعد التنفيذ الذي تحدد في السابعة صباحا . . وظل طوال الطريق يرتب الاجراءات التي سيقوم بها مع السرية التي سيقودها بنفسه ، حتى وصل إلى موقع الكتيبة فوجد الوجوه كلها .

\_ الفرقه المدرعه دى القوه الرئيسية بتاعتنا . . الخوف كله لو اليهود اكتشفونا واحنا نازلين من الطيازات . . لو حطينا رجلنا في سينا يبقى العملية حاتنفذ انشاء الله . وتسلل إلى نفسه خيط من الخوف والقلق حاول أن يسيطر عليه ويقهره .

\_ المهمة شبه انتحاریه . . لو الفرقه بتاعتنا وقفت لأى سبب یبقی السریه كلها اتزنقت فی وسط الیهود . . قائد الجیش ماقالش أی حاجة عن النجده لنا لو العملیه فشلت . . مفیش غیر الطیران بتاعنا هو اللی ینجدنا . . الناس دی شكلها كده مش حاترجع . . هی موته والا اكتر .

وانتبه شریف علی صوت النقیب عامر ولم یکن قد شعر بقدومه:

- \_ ایه یارائد شریف . . سیادتك سارح بعید قوی .
- \_ أهلا ياعامر . . لا أبدا . . اتفضل اقعد . . الناس أخبارها أيه ؟
  - ــ الناس جاهزة على الآخر يافندم . . والمعنويات عاليه قوى .
    - \_ طيب ياللا بينا . . توكلنا على الله .

وأنطلقت بهم العربات متجهه إلى مطار الاسماعيلية حيث سيتم اللقاء مع الطائرات التي ستنقلهم إلى موقع تنفيذ المهمة . كانت المدينة غارقة في ظلام مشرب باشعة القمر الفضية وسكون غريب موحش تقطعه أصوات انفجارات مكتومة على بعد كبير . . ونظر إلى حدائق الاسماعيلية بشجن ووجد حرك في نفسه ذكريات رومانسية عن حب عابر قصير حين كان في بداية عمله منذ عشر سنوات . . وانتبه لنفسه وهو في دهشة من هذه الذكريات التي تهاجمه وهو في هذا الموقف .

وفى الموعد المحدد تماما كانت الطائرات تقلع بهم متجهة إلى عمق سيناء تحت ستر الظلام والكل فى حالة ترقب وصمت . . وفجأة انفجر داخل كل الطائرات وكأنهم على اتفاق فى أقصى حالات الترقب والانتظار . . وعلى الفور اجتمع بضباط الكتيبة شارحا لهم المهمة :

\_ اللى حاينفذ العملية السرية ٤٣ بقيادت ومعايا النقيب عامر وقيادة الفصايل . . مجموعة الدعم بقيادة النقيب صبحى .

واستمر يشرح للضباط المشاركين معه تعليماته بـأدق التفاصيـل حتى اختتم كلامه بحزم واضح:

ـ العملية لا تحتمل أى أخطاء . . عايز كل الناس اللي طالعه معانا تكون عارفه وحافظه كل كلمة قلتها دلوقت . . كل واحد لازم يبقى عارف حايعمل ايه بالضبط . . اتفضلوا .

وانقلب موقع الكتيبة الى خلية نحل لكن دون فوضى فالكل يعرف ما يقوم به . . وتنقل شريف في مواقع الكتيبة حتى يتأكد بنفسه من التجهيز للمهمة .

- ــ يعنى مش حانبلغ يافندم ان احنا وصلنا منطقة الهدف ؟
- ن ولا كلمة في اللاسلكي والا اليهود حايلقطونا ويعرفوا مكاننا وتبوظ العملية .
  - \_ حايبقي عندنا وقت نستطلع مكان الدبابات ؟
- الطيارات حاتنزلنا على بعد ١٢ كيلو متر من الهدف ، حانقطع المسافة دى في حوالى ٥ ساعات يبقى لسه فاضل ساعتين قبل الهجوم تعمل فيهم استطلاع زى ما أنت عايز .
- ــ يارقيب حسن الواد حسنين ده شويـة الهوا الــلى عند الـطياره الهليكــوبتر حايبعزقوه ، ده وزنه خمسين كيلو .
  - \_ بالاش تهريج ياطلبه . . شوف حاجاتك وتمم عليها .

ولما أيقن شريف أن كل ما طلبه من ضباطه قد نفذ ، عاد إلى خيمته وجلس أمامها وكانت الشمس قد مالت على الأفق وشارفت على الغروب . . وأبخذت كلمات قائد الجيش تطفو فوق بحر أفكاره المتلاطم . . واستشعر في نفسه عظم وخطورة المهمة المكلف بها . صوت الأناشيد الوطنية والأغاني الحماسية في محاولة لطرد أي خوف قد يتسلل إلى النفوس . . إلا الرائذ شريف الذي كان يحاول أن يبدو هادئا وهو مشغول بعشرات الأشياء في داخله . . كان يضع احتمالات توقع العدو في كل خطوة ويحاور نفسه عن كيفية رد فعله في كل خطوة . . حتى انتبه فجأة على توقف الجنود عن الغناء فقط هبطت الطائرات في المنطقة المحددة . . واشتعلت أعصاب الجميع وتوهجت كل الحواس وهبطوا في صمت تام وغادرتهم الطائرات الهليكوبتر عائدة وكأنها الحبل السرى ينقطع . .

وفى سواد الليل المشرب بأشعة القمر تجمعوا فى مجموعات خمس وتحركوا سريعا إلى هدفهم بعد أن أشار لهم الرائد شريف إلى اتجاه التحرك ومكان كل منهم أثناء التحرك .

- ــ هم ياعبد الحكيم . . اللي حا يتأخر مالوش ديه يابوي .
- ــ معقول اليهود مش حاسين بكل اللي بيبحصل ده ؟ متهيأ لي عاملين فخ وسايبنا لغاية ما نقع فيه برجلينا .
  - \_ طيب احنا مين حايجمينا بعد ما نضرب اليهود .
- ــ ده قائد الجيش هو اللي طالب المهمه دي بنفسه يبقى لازم عامل حساب كل حاجة .
  - ــ بلاش كلام وانت بتجرى ياصبرى .
  - \_ أرجع يارقيب حسن وقول للنقيب صبحي يخليه على اليمين هو ومجموعته .
    - ــ السعدن شايل حاجات كتيريافندم نقف شويه علشان نخفف عنه .
    - \_ اجرى باطلبه . . لما نقف علشان الراحة ابقى اعمل اللي انت عايزه .
      - ــ ماشيين صح ياعامر ؟
- ـــ أيوه يافندم . . الطريق على شمالنا اهه . . فــاضل ٢ كيلو عــلى منطقــة الانتظار . . الوقت معانا لأن فاضل على الفجر ساعتين .

ووصلت المجموعات الخمس إلى منطقة الانتظار والجميع يتصب عرقاً لاهثين من التعب وكأنهم خيول بعد نهاية السباق . . وبعد فترة قصيرة اجتمع شريف بضباطه الخمس المشاركين معه في المهمة حتى يؤكد لهم الأوامر على أرض المعركة :

- النور اللي على اليمين ده تجمع الدبابات . . عامر انت حاتقفل الطريق بالناس اللي معاك . . وأنا حاخد بقية الناس من قدام الجبل ده وحانهاجم . . أوعى دبابة تفلت منك ياعامر قبل ما خلص الهجوم ، والا أنا والناس اللي معايا حانضيع . .
- ــ ما تخافش یافندم . . مفیش ولا دبابة حاتعدی انشاء الله . . سیادتك خدر راحتك .
  - \_ طبعا مفيش أي كلام باللاسلكي الا بعد الاشتباك .
    - ـ جاهز سيادتك واطمئن يافندم .
- ـــ نقرأ الفاتحة كلنا ونتوكل على الله . . ونتقابل مع المدرعات بتاعتنا على الظهر انشاء الله .

وانصرف الجميع صامتين وكان الظلام ساترا لكل شيء حولهم حتى وجوههم التي كانت مليئة بعلامات التوتر والقلق والخوف . . وانطلق شريف ومعه مجموعة الهجوم نحو الجبل وتبعه عامر وصبحى إلى أماكنهما المتفق عليها .

واتخذ الجميع أماكنهم ، والدقائق تمر عليهم وكأنها ساعات وأيام ، والكل يجبس أنفاسه ترقبا لتوقيت الهجوم . . وانسحبت ظلمة الليل وبدأت بشائر ضوء الصباح تظهر حثيثا . . وبدأ الرائد شريق ينظر من خلال نظارته المكبرة كلى يحدد أماكن الهجوم . . وكاد قلبه يتوقف من هول المفاجأة . . كانت الدبابات أمامه أكثر من ثلاثمائة دبابة وليست مائة كها قال له قائد الجيش . . وارتج داخله بعنف شديد وشعر بجفاف في حلقه . . وحاول أن يتماسك سريعا فقد كان الرقيب تهامى منبطحا بجانبه وكتفه ملاصقا له . . وزحف متقهقرا إلى الخلف حتى توارى قليلا ، وبدأ يلتقط أنفاسه بعمق واضح حتى يهدأ من اضطرابه .

... ثلاثمائة دبابة .. أمال مين اللي قال انهم مائة دبابة وبس .. مصيبة سوده .. الفرقة المدرعة بتاعتنا كده حاتضيع مها عملنا أنا والناس اللي معايا مش حاندمر أكتر من أربعين دبابه أو خمسين حتى .. مصيبة سوده .. الفرقة بتاعتنا حاتدمر . فاضل على ميعاد الهجوم ساعة .. لازم قائد الجيش ياخد خبر بعدد الدبابات اللي موجود علشان يتصرف .. لازم أبلغ قيادة الجيش .

وشعر شريف أنه يسقط في هوة سحيقة بلا قرار . ـ فأى اتصال الآن سيكشف موقعهم للقوات الإسرائيلية ، وفي دقائق سيتم حصارهم ومهاجمتهم بدبابات العدو التي تبعد عنهم أمتاراً فقط سيحكم على أفراد السرية بالموت . . حجر ثقيل يجثم على نفسه . . تفكيره تمزق وانشق نصفين . . شبح الموت يتراقص أمامه فالمحصول وفير . . . وفي لحظة خاطفة لا يعرف كيف أتت ، وجد الهدوء يغمر نفسه والثقة تلملم أشلاء فكره المتنافر . . شيبلغ قيادة الجيش بالموقف الجديد ويقوم بالهجوم على معسكر الدبابات . . وقام إلى أفراد مجموعته وأخبرهم أن الهجوم سيبدأ الآن وأخذ كل منهم يستعد لدوره في الهجوم . . وطلب جهاز اللاسلكي من تهامي وأمسك بحيكروفون الإرسال وارتدى سماعات الارسال على أذنيه .

\_ من قائد ابيض ٢٢ إلى جبل . . من قائد أبيض ٢٢ إلى جبل . . يتم إلغاء

الهيجوم . . الموقف لا يسمح بالهجوم . . العدو مسيطر تماما . . يتم الغاء الهجوم .

وشعر بأن حملا ثقيلا قد انزاح من فوق صدره بعد أن تلقى رد قيادة الجيش. ثم أعطى أشارة لعامر وصبحى بأن الهجوم سيبدأ الآن وفى دقائق كان شريف ومعه مجموعة الهجوم على بعد أمتار من معكسر الدبابات الإسرائيلية وعلى الفور أطلقت محموعة القوذاف صواريخها على الدبابات الرابضة كحيوانات من العصر الحجرى وفى ثوان تحولت الدبابات الى كتل من النيران المشتعلة وتحول المعسكر كله إلى كتلة من الذعر المتحرك انهمرت طلقات الرشاشات والبنادق الآلية تحصد فى الجنود الذين اخذوا على غرة .

- ــ ستاشر دبابه یافندم ..
- \_ هات ولاد الكلب اللي بيجروا ناحية البرج دول .
  - \_ سلم يمينك ياواد يابتاع الفنون .
  - عشرين دبابه ياجدعان . . ولسه .
- أدى اليهود بتوع ٥/يونيو إلى كانوا طالعين بيهم السما؟
- وأفاق المعسكر الإسرائيلي من لطمة المفاجأة وبدأ يرد على نيرانهم بالمثل وما هي إلا دقائق حتى بدأت أصوات جنازير الدبابات المنطلقة من المعكسر لمطاردتهم .
- كل الناس تنسحب ناحية الجبل . . السعدني ومحمود وتهامي معايا علشان نغطي الانسحاب .

كانت أوامر الرائد شريف سريعة وقاطعة ، وأبلغ عامر وصبحى باللاسلكى بأن مجموعته ستنسحب وأن عليهم تعطيل الدبابات لأطول فترة ممكنة .

- لازم حايجصلونا ياصبرى .
- اجرى ياعبد الحكيم حلكم يارجاله .
- رایجیین جری وراجعین جری احنا بنجری من أمبارح باللیل
  - لإزم نوصل الجبل قبل ما يلحقونا .

كان الجبل على بعد كيلو مترات ، وكان تخطيط شريف أنه يمكن أن يحتمى فيه ورجاله من دبابات العدو حتى يجل الظلام فيستطيع إكمال الانسحاب .

- ـــ شفت الواد حسنين بيجرى زى الصاروخ الوزن الخفيف بينفع في الأجوال
  - ـ ایه یا طلبه حتی دلوقت حاتهرج .
  - ـ لو وصلنا الجبل نحمي نفسنا فعلا . . الرائد شريف ده مخ كبير قوى .
    - فصرخ فيهم الرقيب حسن المصرى بصوت شق الفضاء .
      - ـ الصاعقه حديد يا مصر الله اكبر

ورددوا كلماته بحماس سرى فى أوصالهم وكأنهم تعاطوا جرعة منشطة جعلتهم جميعا يزيدون من سرعتهم حتى اصبح الجبل على بعد كيلو متر واحد فقط لكن دبابات العدو كانت قد لحقت بهم وبدأت تطلق عليهم نيرانها .

ـ صبحى ومعاك السعدنى انزلوا فى الحفره دى واناً وراك على طول . عطل أول دبابه بأى طريقه .

- ایه صبری شد حیلك شویه واجری معانا .
- . \_ مش قادر یا رقیب تهامی ، رجلی انجزعت ..
  - حاسس ان قلبي حايقف .

وصرخ شریف فی صبحی وکان علی بعد خمسین مترا

ـ ایه یا صبحی . . دلوقت!

وفى نفس اللحظه التى صرخ فيها شريف كان صبحى يلقى قنبلة على أول دبابة وكانت على بعد عشرين متراً منه فأصابتها فى مقتل مما عطل طريق المطاردة لباقى الدبابات خلفها لعدة دقائق كانت كافية لان يقتربوا من الجبل حتى أصبح على بعد أمتار منهم . . لكن الدبابات أخذت تلاحقهم بخراطيم من نيران تنطلق من فوها المدافع .

- عامر . اوقف الناس بتوعك واشتبك من اليمين ، انا وصبحى حانشة من الشمال . واخذوا أماكنهم التى اشار إليها الرائد شريف واستمروا فى تباد النيران مع الدبابات الإسرائيليه وكان الاشتباك غير متكافىء فلا يمكن لإنسان من لحم أن يواجه قلعه من الحديد والصلب ولكنها كانت محاولة من شريف حتى ينقذ

أكبر عدد من أفراده يمكن أن يصلوا إلى الجبل . . ونجحت المحاوله بفضل عبد العزيز الذى تسلق أول دبابة وألقى بقنبلة يدوية فى داخلها ، لكن جسده النحيل تلقى أكثر من ثلاثين طلقة من الدبابات الأخرى ونجحت محاولة عبد العزيز الانتحاريه فى أن توقف تقدم الدبابات لفترة كانت كافية لأن يلحق شريف ومجموعته التى كانت تغطى الانسحاب بزملائهم فوق الجبل .

ـ عبد العزيز كان انسان عادى جدا . . محدش كان يتخيل انه يعمل كده .

\_ الانسان العادى ده طلع انه اعظم واحد فينا كلنا .

. سمعت كثير عن اعمال بطوليه لكن اول مره اشوف البطوله بعينى . . الله يرحمه .

\_ خد الله على السلامه يا فندم .

\_ الحمد الله . لكن لسه بدرى على الكلمه دى . . قدمنا النهار بحاله وبعدين على الكلمه كل . . قدمنا النهار بحاله وبعدين على كيلو لغايه قواتنا .

\_ انشاء الله حانرجع يا فندم .

ـ احنا لغایه دلوقتی عندنا ۳ شهداء و ٤ متعورین بس .

ـ الناس تاكل لقمه . . ووزع الناس يا عامر على مواقعها بعد ما ياخدوا راحه ربع ساعه .

\_ حاضر يا فندم .

وارتمى الجميع على ظهورهم بغية تجديد قـواهم استعدادا لما هو قـادم . . . ساعدهم أن الجوكان مشبعا بنسمة رطبة والنهار مازال في أوله .

\_ معقول الجيش حايسينا كده ؟

- يا بني الرائد شيريف اتصل قدامي وقال لهم الموقف بالتفصيل .

يابن ادم دول رتب كبيره يعني اكيد عاملين حساب كل حاجه .

ـ لم تمض عليهم إلا ساعة حتى عاود العدو هجومه عليهم بنيران مدفعيه هذه المرة ، فلم يكن أمامهم سوى الاحتماء في الأرض كانوا جميعا منبطحين ملتصقين بالأرض وكانها صدر الأم الحنون . . وكان شريف هو الوحيد الذي يعرف أنه لا مساندة من القيادة لهم ، فهم محاصرين بقوات اسرائيلية من كمل الجهات . .

وسكتت المدفعية الاسرائيلية وتقدم نحوهم جنود مشاة ، لكن موقعهم العالى فوق الجبل كان يعطيهم ميزة عليهم وانفجرت طاقاتهم المخزونة ، وزادهم عنفا إحساسهم بأنهم محاصرون وأن لا مفر أمامهم إلا تكبيد العدو أكبر خسائر .

- \_ شايف اللي داخلين علينا من اليمين دول ؟
- ـ اثبت لغاية ما يقربوا خالص محدش يفتح نار غير لما اقول .
  - ـ يا حبيبي . . ثلاثه منهم اتكوموا مره واحده .
    - ... وما رميت اذرميت ولكن الله رمى .

واستمر تبادل إطلاق النار مدة طويلة فشل خلالها العدو في تحقيق أى مكسب عليهم بل إنه خسر أعداد كبيرة من القتلى ، فلم يكن أمامه إلا الإنسحاب من أمامهم استعدادا لمعاودة الهجوم عليهم مرة أخرى ومضى باقى النهار والعدو يحوم حولهم عن بعد وهم يراقبون تحركاته ، وكانوا في دهشه من ان الشمس قاربت على المغيب والعدو لم يعاود الهجوم منذ الظهيرة .

- ـ لو دخل علينا الليل ، حانرجع بأذن الله .
- غريبه انهم من الظهر لغايه دَلُوقت مفيش أي هجوم .
  - \_ أصل احنا علشان فوق الجبل وضعنا احسن منهم .
- \_ خسايرهم كبيره يا فندم انا لوحدى شفت عشرين قتيل .
  - ـ الحق يا فندم . . كل الناس تستعد .

صرخ النقيب عامر مستنجدا بالرائد شريف ، كانت على البعد طائرة هليكوبتر قادمة نحوهم . . وعلى الفور هب الجميع يحتمون بثنايا الأرض . . وفي ثوان كان الجبل يشتعل بالنيران فقد ألقت عليهم الطائرة قنابل نابالم ، ثم دارت حولهم وهم فى موقف العاجز حيث لا يملكون أى سلاح مضاد للطائرات ، وعادت الطائرة تقصفهم بالنابالم وهم في حيرة بالغة . . فالطائرة ستواصل هجومها حتى تنهى عليهم

ـ عامر . . خد الناس . . وانزل من الجبل . . فى اتجاه قواتنا . . لو فضلنا هنا . . الطياره حاتخلص على الناس كلها كانت أوامر شريف تخرج واهنة متقطعة بعد ان اصيب بحروق شديدة من

النابالم . . وكان هذا هو المخرج الوحيد الباقى امامهم ، فهتاك فرصة ولو ضئيلة فى النجاة افضل من ثباتهم فى هذا المكان .

\_ اعمل نقاله بسرعه ياتهامي علشان نحط عليها الرائد شريف .

ـ سبحان من له الدوام يا نقيب عامر . . الرائد شريف قابل ربه . . خلاص .

- في الجنه ونعيمها انشاء الله . . كلهم

وسقطت دمعة من عين عامر ، لكن سرعان ما تماسك حتى يستطيع انقاذ المجموعة الباقية . . كان الحزن ترفا لا يتوفر في مثل تلك اللحظات . . وعلى الفور انطلق الجميع بأقصى سرعة يحاولون هبوط الجبل في اتجاه الغرب نحو القوات المصرية ، والطائرة مازالت تحوم فوقهم . . وفطن الطيار الاسرائيلي لما يسعون إليه ، فعاود الهجوم عليهم لكن بنيران مدفع الطائرة .

ـ اجرى يا عبد الحكيم ، ولما يدخل علينا ارقد على الارض طوالي .

ـ فين طيارتنا تيجي تضربه ابن الكلب ده .

ـ يارب فاضل على الليل نص ساعه .

ولما أيقن الطيار الاسرائيلي انه أحدث فيهم خسائر فادحة مر فوق رؤ وسهم منخفضا جدا ثم عاد أدراجه . . وكانت هذه هي الحقيقة فقد استشهد جميع ضباط السرية ومعظم افرادها . . ويقى عدد بسيط بقيادة الرقيب حسن المصرى تمكنوا مر العوذة متسللين ليلاحتى وصلوا إلى وحدة مصرية « متمركزة » في شرق القناه .

وما أن علم قائد الجيش بوصولهم حتى أمر باحضارهم لمقابلتهم وعلى الف ورغم الارماق الشديد استقلوا عربة إلى الاسماعيلية تنفيذا لاوامر قائد الجيش كان الرقيب حسن المصرى يركب بجوار السائق في المكابينة وباقى القوه في الصند الخلفي . . .

- حا اقول له على عبد العزيز واللى عمله . . الواد نط فوق الدبابه وحط الله في ثانيه . . وحا اقول على الرائد شريف . . كان بيعمل كل حاجه مضبوط بس ن عاجز قدام الطيران . . لازم اسأله فين الطيران بتاعنا ، لو كان ظهر حتى الماكنش حصل اللى حصل . . احنا مات مننا كتير بس خسرنا اليهود اكتر .

وما هى الاساعة حتى كان الرقيب حسن المصرى ومن بقى معه امام قيادة المجيش ورغم الارهاق والتعب حاول حسن المصرى أن يكون فى وقفته امام قائد الجيش مشدودا منتصبا .

ــ تمام یا فندم القوه ۹۸ استشهد ۳ ضابط ، ۳۹ فرد . . العائدون ۲۳ فرد ، ۵ جرحی والباقی جاهز لأی اوامر یافندم .

وشد قائد الجيش على يد حسن المصرى وظل محتفظا بكفه وهو يحدثه :

- حمد الله على السلامه . . انتم عملتوا حاجه كويسه قوى . . خـد الناس بتوعك وارجع للكتيبه علشان ترتاحوا .

وركب قبائد الجيش عبربته وقبال لمساعبده الذي كبان بجواره وهبو يشعبل سيجارته .

- غيرنا الخطه بالكامل بسبب البلاغ بتاع شريف . . والأولاد دول أبطال والله .

## قصر في الجنة

دبت الحياة في الميدان الكبير الذي يطل عليه من شرفة منزله بمصر الجديدة . . كان الجو صحوًا رغم انه منتصف شهر ديسمبر وقد جلس يتصفح إحدى المجلات الأجنبية التي تمتلىء بالشرح والتحليل عها دار في حرب أكتوبر ١٩٧٣ التي انتهت منذ أقل من شهرين . . كان مشدوداً بكل تفكيره إلى آراء الخبراء العسكريين الاجانب وخاصة اراء الإسرائليين الذين اشادوا بما فعلته القوات المسلحة المصريه اثناء الحرب . . لكنه خرج من استغراقه على رنين التليفون .

\_ ألو . . منزل العقيد عادل الشهاوى .

ـ نعم . . أنا هو ياسيدتي .

وكأنها وجدت ضالتها أخيرا فاندفعت في الحديث دون توقف :

ـ آسفه یا سیدی انت لا تعرفنی . . انا والدة الملازم طیار عبد القوی شمس الدین . . أرید ان اراك لحاجة ضروریة . . هل یمکن ان ازورك بمنزلك أم ان هذا شیء یزعجك ؟

وتمالك نفسه سريعا من المفاجأة فهى والدة أحد الطيارين الذين استشهدوا فى الحرب تحت قيادته.

ــ تشرفت بمعرفتك يا سيدتى . . وأهلا بك فى أى وقت . . لكن الواجب أذ أحضر أنا اليك .

\_ اذن ليكن لقاؤنا في السابعة مساء اليوم بمنزلى .

كانت كلماتها منفعلة ومتوترة فلم يحاول أن يراجعها بل صدق على كلماتها بعد أن أخذ منها عنوان المنزل مؤكداً انه سيحضر في الموعد المحدد .

ألقى بالمجلة جانبا واشعل سيجاره وضاقت عيناه قليلا وهو يحاول ان يسترجع كلمات هذه السيدة التي لم يعرفها من قبل ، ثم قادته افكاره إلى ابنها الذى استشهد في حرب اكتوبر منذ شهرين . . لقد كان معه في نفس الطلعة التي كانوا يهاجمون فيها موقعاً اسرائيلياً ، وبعد الانتهاء من الهجوم طاردتهم المقاتلات الاسرائيليه . . كانوا أكثر منهم عدداً ولهذا استطاعوا أن يدمروا طائرة عبد القوى . لقد شاهد طائرته وهي مشتعلة ثم وهي تنفجر في الجو . . لقد صرخ فيه باللاسلكي ان يقفز من الطائرة ، لكن اصابته كانت قاتلة فلم . يجد صراخه . . ودخلت عليه زوجته وهي تحمل صيئية الشاي متساءلة . فحكي لها مادار بينه وبين تلك السيدة .

\_ ربما كانت في حاجة اليك ، خاصة في اجراءات المعاش .

ـ لا اعتقد ذلك فهو من عائلة بالغة الثراء . . لقد كانت هدية تخرجه من الكلية عربة المريكية من أحدث طراز . . أعتقد أنها تريدني في شيء آخر

وفى الموعد المحدد كان يستقل عربته متوجها إلى فيلا العائلة الواقعة على النيل بالجيزة . . رمازال يتساءل فى نفسه عن سر هذا اللقاء . . لقد مر بهذا الموقف كثيرا ويعرف انه لقاء ثقيل على نفسه ويصيبه بحزن كبير رغم مشاعره التى تبدو باردة أمام الآخرين . . وفى العنوان المحدد لم يجد فيلا كها توقع وانما قصراً محاطاً بحديقة مترامية .

رافقه حارس البوابة عبر الحديقة الكبيرة حتى الباب الداخلى ثم رافقه خادم آخر حتى الصالون الذى استقر فيه مبهوراً من الثراء الذى ينم عنه اثاث القصر البالغ الفخامة . . وبعد فترة جاءه خادم ثالث يتلقى أوامره فوجد أن القهوة مناسبة في مثل تلك الظروف ، وأخذ يتجول بعينيه في التحف الموجودة في أركان البهو الجالس فيه ثم في السلم الخشبي الذي يؤدي إلى الدور العلوى . . كان السلم تحفة فنية من الخشب والنحاس المشغول .

وجاء الخادم بالقهوة ، وفي نفس الوقت سمع خطوات السيدة التي جاء لزيارتها وهي تهبط درجات السلم . . وكانت لديه مسافة كافية كي يتأملها وهي قادمة إليه . . كانت في الأربعين من عمرها لكن جمالها مازال مضراً ، تمشى في ثقة وثبات . . واستلفت نظره أنها محمجبة وكان الحجاب شيئا غريبا في هذا الوقت خاصة

## لمن كان في عمرها

- خالص عزائی یا سیدتی
- شكراً . . لكن الأحياء لا يقبل فيهم عزاء

وأفحمته كلماتها الواثقة فجلس وهو لأيدري ماذا يقول إلى أن بادرته بالكلام

- ـ كان عبد القوى ابني طياراً تحت قيادتك . . هل كنت تعرفه جيداً ؟
  - ـ نعم یا سیدی ، أعرفه جیداً
- ـ هل كنت تعرف أنه وحيدى ؟ . . لقد توفى والده وهو فى العاشرة ومن يومها ونحن متلاصقان لم يكن أحدنا يخفى عن الأخر شيئاً فى حياته
  - ـ لم أكن أعلم تفاصيل حياته العائلية . . ومعرفتي به كانت من خلال العمل
    - اذن فيها كان الخلاف بينك وبينه ؟
- ـ بالعكس كان عبد القوى قريبا إلى نفسى مثل كثير من الطيارين الذين تحت قيادتى فناولته ورقة مطوية وهو في دهشة كبيرة من الموقف كله
  - ـ اذن أرجو أن تقرأ هذا

وكانت الورقة خطاباً من عبد القوى إلى والدته أرسله لها بعد اسبوع من بداية

أمى الحبيبه

سلام الله عليك ورحمته وبركاته . . انا وزملائي جميعا بخيريا أمى . . الحرب نحن منتصرون فيها باذن الله . . دعواتك يا أمى ان تكون مصر دائها منتصرة . . أنا أبذل قصارى جهدى كها تعودق منى طوال حياتى . . لكن العقيد عادل اصدر اوامره لى بألا أشارك فى أية طلعات لمهاجمة اليهود ، ومضى على هذا الأمر يومان ولا أدرى لماذا يحرمنى من المشاركة فى الحرب ؟ وما هى اسباب هذا القرار ؟ . . ورغم أنه قائد متزن وأشعر نحوه بحب واحترام لكن هذا الأمر ضايقنى كثيراً . . أرجو أن تكونى راضية عنى وهذا ما يهمنى كثيرا . . أعاهدك بأن نكون من المنتصرين باذن الله . وإلى أن نلتقى أستودعك الله

ولدك<sup>.</sup> عبد القوى شىمس الدين وانتهى عادل من قراءة الخطاب ورفع رأسه ببطء والصمت يلف المكان كله إلا من صوت بعض قطرات المطر ترتطم بزجاج الصالون . . كان يشعر أنه في حلم غريب وأنه عاجز عن الكلام . . لكنها لم تتركه لنفسه بل عاجلته كلماتها

\_ لقد طلبت زيارتك لكي تفسر لي أمرين أولهما هذا الخطاب .

وأخذ يسترجع زمام نفسه حتى يواجه تلك السيدة وهدوءها المثير.

ـ سبدق . . إن ابنك قد تخرج من الكلية الجوية منذ عام وكان في التاسعة عشر من عمره والتحق فور تخرجه باللواء الجوى اللذى أتولى قيادته ضمن ثمانية من دفعته ، وكنت أتولى تدريبهم على القتال بنفسى ، ولهذا كنت أعاشرهم فترة طويلة وتولدت بيني وبينهم رابطة خاصة . . كنت اشعر بأنهم اخوة صغار لى وليسوا ضباطاً تحت قيادتى .

- إذن لماذا حرمته من الاشتراك في الحرب بعد اليوم الخامس ؟

وشعر بأن ثقته بنفسة قد عادت إليه تماماً وأنه أصبح المسيطر على الحديث : لم يكن الأمر شخصياً يا سيدى ، أو لأن عبد القوى لا سمح الله مقصر أو ضعيف عن زملائه .

\_ إذن ما هو السبب .

- السبب يا سيدى أن أوامرى منذ بداية الحرب كانت أن يتساوى جميع الطيارين في عدد الطلعات ، فليس هناك إنسان أجدر من الآخر بالحياه أو أجدر منه بشرف الشهادة . وفي اليوم الخامس فوجئت بأن عبد القوى يسبق أقرانه في عدد الطلعات بمقدار الضعف تقريبا ، ولهذا بعد ثلاثه أيام أمرته بالطيران معى في نفس التشكيل وقد استشهد في هذه الطلعة .

وهدأت نفسه تماما وأشعل سيجارة .

اعتقد الآن أنك مطمئنة إلى أن إيقافى لعبد القوى لم يكن عن غضب منه أو عقاب له . . بل بالعكس تماما . . . لكن أمر الله الذي لا رد لقضائه . . .

وقاطعته بكلماتها الهادئة الشديدة الثقة .

ـ هذا هو الأمر الأول يا عقيد عادل أما الثانى فهو هل عبد القوى استشهد وهو مقبل أم مدبر .

ولم يفهم معنى سؤالها .

\_ افندم .

\_ هل عبد القوى استشهد وهو مقبل أم وهو مدبر ؟

وأدرك معنى سؤ الها وانتابته مشاعر متضاربة من الانبهار بهذه السيدة والدهشة والغرابة من مشاعرها .

- سيدى إن ابنك شهيد حق . . لقد استشهد عبد القوى وهو يقاتل قتال الأبطال . . لقد استشهد في سبيل الله حقا . . أقسم لك أني شاهدته بعيني وهو يدمر موقع اليهود ثم اشتبك مع طائرتين اسرائيليتين ولولا هذا لما تمكنا منه . . أقسم لك يا سيدى أنه في الجنة مع رفقاؤ نا الذين سبقونا .

ورانت لحظة صمت طويلة ولم يدر ماذا يقول بعد هذا ، إلا أنه صوب نظرة نحوها ينتظر ماذا تقول . فوجد أن وجهها قد تألق بفرحة غريبة وأشرقت عيناها وهي تقوم إلى غلبة من الفضة كانت على المائدة تفتحها .

- أشكرك يا سيادة العقيد . . لقد أسعدتني كلماتك أيما سعادة . . ومن الواجب الآن أن نتناول بعض الحلوي .

فتناول قطعة من الحلوى وهو فى دهشة من هذه السيدة التى أثارت فى نفسه مشاعر متضاربة شتى . . وكان لابد وأن ينهى الزيارة بعد أن جثمت أحزان كبيرة على صدره . . وخرج من القصر الفاخر وقد خفت حدة الأمطار إلا من رذاذ خفيف .

وانطلق بسيارته عائدا وقد تُوقف تفكيره عند هذه السيدة وما أثارته في نفسه من أحاسيس . . ولاحظ أن المطر المتساقط على زجاج السيارة يعوق الرؤية أمامه فقام بتشغيل مساحات الزجاج الأمامية . . لكن لم يجد لها أي تأثير على الرؤية . . فقد كانت عيناه مغرورقتين بالدموع .

## فارس هزم الموت

كان المساء ربيعياً لطيفا فهو يوم من أيام شهر إبريل ، وقد هبط توفيق وحيدر من عربتها الصغيرة فى حديقة نادى الضباط . . لم يكونا شقيقين فقط وإنما كانا متلاصقين بشدة فالفاصل فى العمر بينها عام واحد وطوال الدراسة كانا سويا حتى التحقا بالكلية الجوية وتخرجا كطيارين فى القوات الجوية فى دفعتين متتاليتين ، وإن فرق بينها مكان العمل فكان توفيق الشقيق الأكبر يعمل فى أسراب المقاتلات فى قاعدة أبو صوير أما حيدر الشقيق الأصغر فكان مدرسا بالكلية الجوية فى بلبيس . . كان الشقيقان على موعد مع محمد الذى كانت تربطه بها علاقة حميمة خاصة فهؤ من ناحية دفعة توفيق الشقيق الأكبر وفى نفس الوقت يعمل مدرسا بالكلية مع حيدر الشقيق الأصغر .

- \* أهلا أبوحميد .
- وتعانق محمد وتوفيق بشوق واضح ، ورد محمد التحية مداعبا :
  - أهلا بالأخوة كارمازوف .

وانعزل ثلاثتهم في أحد أركان النادى يتبادلون الذكريات التي يتخللها التعليقات الساخرة . ثم انحرف بهم تيار الحديث إلى موضوع الطيران الذي لا ينتهى فيه الحديث طالما اجتمعوا سويا .

- شهر ياعم توفيق من آخر مرة اتقابلنا فيها .
- پا أبو حميد هو إحنا زيكم ، كل يـوم فى مصر وأجـازة خميس وجمعة . .
   العنملية عندنا مزنقة قوى ، طـوارىء وطيران ليـلى كل أسبـوع ونهارى ، ده غير

الاستعراضات . . من الأسبوع الجاى حنبتدى بروفات ٢٣ يوليو أنتم أصلكم في دلع ومش مقدرين .

\* يا عم اسكت . . اللى مايعرفش يقول عدس . . ده ألعن حاجة فى الدنيا إنك تكون مدرس فى الكلية ، غارف زى اللى مربوط فى ساقية ، كل يوم خمس طلعات وزى الريكوردر ، اللى تقوله تعيده كل يوم . . ماتقول لاخوك يا سى حيدر احنا شكلنا إيه فى الكلية .

\* انت عارف يا توفيق إن أنا ومحمد قدمنا طلب نقل من الكلية علشان نرجع المقاتلات .

\* اسمعوا كلامي والله . . المقاتلات شغلها آخر قرف ، والكلية أريح ميت مرة .

\* طيب تيجي الكلية معانا .

وبدون تفكير رد توفيق على الفور:

\* لا طبعا . . نوعية الطيران مختلفة . . ولا أقدرش دلوقت أسيب الميج ٢١ . وقاطع حيدر شقيقه :

\* احنا حانسهر هنا الليلة كلها والا إيه ؟ يا للا بينا على الأوبرج ، عازمكم الليلة على حساب .

\* انا ومحمد كنا عايزين نشوف المسترحية اللي في المسرح القومي .

\* يا عم مسرحية إيه ، هو احنا ناقصين غم . . ده فيه باليه أسباني في الأوبرج يجنن . . ونزولا على رغبة حيدر وأمام إصراره قضوا السهرة في الأوبرج استمتاعا بالصحبة ، وتفرقوا عند الفجر على أمل اللقاء في أجازة توفيق المقبلة .

ولم يمض على تلك الليلة سوى أسبوعين فقط ، إلا واندفعت الأحداث في تيار هادر أخذ الجميع على غرة ، بداية من إعلان الطوارىء في ماييو ٢٧ . . حيث تلاحقت الاحداث بعدها وصدرت مئات التعليمات والأوامر فألقت بحيدر في أحد أسراب المقاتلات في سيناء أما محمد فبعد جولة سريعة في ثلاثة مطارات مختلفة استقر به الأمر في السرب المتمركز في اليمن ، بينها ظل توفيق في قاعدة أبوصوير كها هو .

وجاء الخامس من يونيو بضربة إسرائيل الجوية المباغتة التي هزت كيان الملايين ، ٧٤ إلا نفر قليل كان منهم توفيق . . فها أن انتهت الهجمة الإسرائيلية الأولى على مطار أبوصوير حتى انطلق توفيق بطائرته وأقلع من على المر الفرعى الذى كان قد دمر جزء منه . . كان يدرك أن الموجة الإسرائيلية الثانية ستصل فى خلال دقائق ويستطيع هو ومن نجح فى الإقلاع منعها من استكمال تدمير المطار وباقى الطائرات ، وتمكن فعلا توفيق هو وبعض زملائه إفساد الهجمة الإسرائيلية الثانية ، لكن تكاثر الهجمات الإسرائيلية أغلق مطار أبوصوير فى الثانية ظهراً لكن فى اليوم التالى مباشرة كان قد تم إصلاح الممر الفرعى وأقلع توفيق ضمن تشكيل من أربع طائرات لحماية القوات البرية فى سيناء التى كانت تحت رحمة الهجمات الجوية الإسرائيلية . . وفوق منطقة غرب مدينة العريش اشتبك التشكيل المصرى مع تشكيل إسرائيلي من ثمانى طائرات ، واندفع توفيق بطائرته خلف طائرة إسرائيلية ودخل معها فى معركة عنيفة تمكن خلالها من إسقاط الطائرة الإسرائيلية لكن طائرة إسرائيلية أخرى تمكنت منه وأسقطته . . واستشهد النقيب طيار توفيق دبوس فى صمت بعد بطولة رائعة ، لكن ظروف الهزية جعلت منه رقها ضمن آلاف الأرقام التى ضمت شهداء حرب ٢٧ . .

.. وتوالت الأيام ثقيلة بعد هزيمة ٦٧ ، وبدأت الكلية الجوية في استثناف نشاطها .. وكان من الطبيعي أن يتم عودة محمد وحيدر كمدرسين إلى الكلية . . والتقيا في مطار مرسى مطروح وفي نفس كل منها الكثير من آثار تلك الفترة التي افترقا خلالها .. وكان لقاء قصيرا عابرا في أول الأمر ، فقد دخل محمد إلى مبنى السرب قادما من القاهرة وكان حيدر ذاهبا إلى طائرته مع أحد طلابه ، فتبادلا تحية قصيرة عابرة .. ثم جاء المساء وضمها مجلس منعزل على شاطىء البحر ، وساد بينها صمت عميق ، فكل منها يعرف مايدور في خلد الآخر . . إلى أن قطع حيدر هذا الصمت .

\* حمد الله على السلامه يا محمد . . رجعت من اليمن أمتى ؟ ورد محمد في تثاقل وهو يعرف أن حيدر يحاول أن يتجنب الحديث فيها يجول بخاطره :

\* رجعت أول أغسطس ، قعدت شهر في قويسنا وأول امبارح قالوا لي على الكلية من ثاني ـ طبعا أنا جاى ومش ناوى أقعد في الكلية ومن بكره حااقدم طلب نقل للمقاتلات .

\* ده اللي انا عملته فعلا . . أنا هنا من أسبوع تقريبا وبعد وصولى على طول قابلت كبير المعلمين وقلت له على النقل .

بص یا حیدر الکلیه مش حاتوافق علی النقل بسهولة ، لکن لو وصل الأمر
 للوزیر حانروح له .

وروس با محمد . . أنا أخذت قرار خلاص . . باارجع المقاتلات ثاني بااما حاسب الجيش كله . . إزاى مش عارف

ثم ساد الصمت بينهما مرة أخرى بعد أن توتر حيدر وهو يتحدث عن النقل من الكلية . . ووجد محمد أنه لابد وأن يواجه الموضوع الذي يحاول أن يتجنبه .

\* البقية في حياتك ياحيدر . . طبعا انت عارف إن توفيق كان اخويا زى ماهو اخوك .

وقابل حيدر كلمات محمد بصمت كان أبلغ من اية كلمات تعبر عما بداخله .

\* حيدر . . انت عارف طبعا إن الشهيد في الجنة ، وتوفيق كسب والله . وياريت احنا نلحقه . . شوف ربنا بيقول « أحياء عند ربهم يرزقون » .

واستمر حيدر في صمته وكان لابد أن يواصل محمد كلماته :

\* انا عارف یا حیدر أن توفیق كان بالنسبة لك أخ وصدیق ، وحاجات كتیر قوی . . لكن دی إرادة ربنا ولازم نتقبلها . . أنا مش عایز أقولك حزنی قد إیه علی توفیق ، لكن ربنا یصبرنا یا حیدر . .

وتكلم حيدر أخيرا بعد طول صمت:

انا عارف يا محمد إنك زعلت على توفيق قوى ، وعارف توفيق كان إيه بالنسبة لك ، وكل الكلام اللي قلته عن الموت وعن الشهيد أنا عارفه كويس . . وباادعى ربنا كل يوم إنه ينزل على الصبريا محمد . . بس البني آدم ضعيف . . والفراق صعب .

وشعر محمد من النبرات المختنفة أن حيدر يبكى ، فصمت قليلا حتى تمسح الدموع تلك الأحزان الهائلة التي تضطرم في صدر حيدر . .

\* تعرف یا محمد . . دی أول مرة دمعة تنزل من عینی علی توفیق من یوم ماربنا اختاره . . واستمر محمد فی صمته تارکا لحیدر أن یفرغ کل مافی صدره .

- \* أنا حاسس بحاجة في قلبي مش عارف أوصفها . . أنا رجعت من سينا في عربية نقل يوم ٧ يونيو وشفت مناظر طول ما انا بانسحب مش ممكن حاتروح من عيني أبدا . . تصور وصلت الاسماعيلية الساعة خسه العصر وقعدت أبص على سيناء والنار مولعة في كل حاجة قدام عيني ، ومفيش ساعتين وعرفت إن توفيق استشهد . . ومن ساعتها وأنا حاسس إن النار جواي .
- \* معلهش یا حیدر . . النار دی مش إنت لوحدك اللی حاسس بیها . . احنا كلنا یا حیدر النار دی مولعه فینا . . هو اللی حصل ده سهل . . ده كویس إن احنا لسة واقفین ونتكلم ، لكن الواحد بیقول إن ده درس من ربنا علشان نعرف قد إیه احنا وحشین . .
- \* وحشين دى كلمة بسيطة قوى . . لو شفت اليهود عملوا إيه فينا واحنا بننسحب تقول علينا وحشين من هنا لبكرة . . آه . . نفسى أعرف الحرب دى كان سببها ايه ؟ وسينا ضاعت ليه ؟
- \* بكره حانقف تانى يا حيدر ، وسينا حاترجع انشاء الله . . احنا فينا ناس كويسه قوى ، بس القيادات هي اللي ضيعتنا .

واسترسل الحديث بينهما وتحمد يجاول أن يزيل عن حيدر بعض أحزانه ويأسه الذى كان يسيطر عليه تماما . . ورغم أن محمد أيضا كان الحزن يثقل قلبه ، لكن كان يسيطر على نفسه وساعدته نزعته الدينية على التمسك بصورة أفضل من حيدر .

الوالده والوالد عاملين ايه ؟

\* حا أقولك إيه يا محمد . . الوالد كويس والمحكمة والقضايا وآخذين وقته كله ، لكن المشكلة كلها في الحاجه . . كل ما أنزل أجازة الأقيها بتعيط . . كل ما تكلمني كلمة تجيب سيرة توفيق وتعيط . . بتتكلم عنه كأنه حايد خل عليها في أى لحظة . . ربنا يصبرها .

طبعا یا حیدر مش أم . . إذا كنا احنا مش مصدقین ، أمال هی تعمل
 إیه . . ربنا یكون فی عونها . . والبركة فیك انت واخواتك .

وعلق حيدر على قول محمد بسخرية مريرة :

\* اخواتى . . هه . . نادية يا سيدى حاتسافىر الكويت خلاص لأن أجازة

جوزها خلصت ، وسمير طالع في دماغة يهاجر أمريكا بعد اللي حصل .

\* حااقول ايه ؟ ربنا موجود وأحسن من الكل .

وتوالت الأيام على محمد وحيدر في توتر وقلق مستمر ، فقد شرعا في السعى الى النقل من الكلية الجوية والالتحاق بأسراب المقاتلات ، لكن رغبتها قوبلت برفض شديد بحجة حاجة الكلية إليها . وقد دفعها الإصرار على النقل إلى مقابلة كبير المعلمين أكثر من مرة وحاول معها بشتى الطرق أن يعدلا عن طلب النقل لكنه فشل تماما فاضطر الى تحويل الموضوع إلى مدير الكلية الذي قابلها بود مصطنع :

\* يا أولاد اللي بتعملوه هنا في الكلية مش أقبل أبدا من اللي حاتعملوه في المقاتلات . . وبعدين ده انتم اللي حاتبعتوا للمقاتلات الطيارين اللي حايتخرجوا من تحت إيديكم .

\* معلهش يا افندم إحنا شايفين إن احنا في المقاتلات حانقدر نفيد أكثر . . وبعدين الكلية فيها مدرسين كتير غيرنا يعنى التدريس مش متوقف علينا احنا الاتنين . .

وكان رد محمد جافا متوترا من طول ماشرح وجهة نظره التي تجعله يطلب النقل من الكلية ، وشعر بذلك مدير الكلية فحاول أن يتلطف معهما :

\* أنا معتمد على المدرسين الأكفاء اللي زيكم ، وبعدين أنا ممكن أنقلكم تدرسوا للطلبة اللي في مطار إمبابة وتبقوا كل يوم في مصر .

\* يا افندم احنا مش بنقول نتنقل علشان نقعد في مصر ، احنا طالبين نتنقل إنشاء الله أسوان بس يكون في المقاتلات .

وهنا انفعل عليهما المدير بعد أن وجد أن التودد لم يؤت نتيجة :

\* یا حضرات انتم مش عارفین البظروف اللی احنا فیها . . سینا محتله ، والیهود علی القناه ، یعنی علی بعد ۱۰۰ کیلو متر من القاهرة . . والبلد عایزه طیارین بأی شکل ، وانتم عایزین تتخلوا عن واجبکم وبتدوروا علی راحتکم .

\* ياسيادة المدير احنا مش بنتخلى عن واجبنا . . واليهود اللي محتلين سينا دول احنا عايزين نتنقل علشان نخرجهم منها . . ونبقى بندور على راحتنا لو طلبنا نتنقل

شركة مصر للطيران . . يافندم سيادتك عارف إن الشغل في المقاتلات قد هنا غشر مرات ، يعنى لو بندور على الراحة كنا وافقنا سيادتك ورحنا ندرس في امبابة .

وساد الصمت لفترة وشعر المدير في قرارة نفسه أنه أمام نماذج وطنية حقيقية تعبر عن نفسها بصدق وحماس الشباب . . فجاءت كلماته من نبع إنساني ذاخر كان محتجبا خلف الرتبة والمنصب .

\* انا مقدر شعوركم يا اولاد . . ومصر بخير طول مافيها شباب زيكم . . وانا لو مكانكم يمكن كنت ها اعمل زيكم . . لكن فرق السن والخبرة والموقع اللي انا فيه دلوقت هو اللي يخلليني أقول لكم بلاش النقل . . محمد انت مستقبلك في الكلية انا مقدر شعوركم يا اولاد . . ومصر بخير طول مافيها شباب زيكم . . وانا لو مكانكم يمكن كنت ها اعمل زيكم . . لكن فرق السن والخبرة والموقع اللي انا فيه دلوقت هو اللي يخلليني أقول لكم بلاش النقل . . محمد انت مستقبلك في الكلية كويس ، سنك صغير وخبرتك في التدريس كويسه . . وانت ياحيدر كلنا عارفين ظروفك العائلية . . فكر في والدك ووالدتك ، مش كفاية الصدمة بتاعتهم في توفيق . . انت عارف لو جرى لك حاجة حايبقي شكلهم إيه ؟ . . دول أب وأم وكفاية صدمة واحدة قوى .

واستفزت كلمات المدير أحزان حيدر المكتومة فانطلق ثائرا منفعلا، ناسيا الاحترام الواجب للمدير وللرتبة :

\* هو أنا أقل من محمد . . أبويا وأمى أنا مليش دعوه بيهم . . وموضوع أخويا ده شيء يخصني أنا وبس . . هي سينا علشان ترجع مش لازم ناس زي تموت . . وهو انا لوقعدت في الكلية وماحاربتش مش حا اموت .

واندفع حيدر خارجا من المكتب دون استئذان والغضب ينضح من كل خلاياه . . وبهت محمد من موقف حيدر وتصرفه حيال مدير الكلية ، فظل يعتذر نيابة عن حيدر ويكرر اعتذاره حتى لا يؤثر هذا الموقف على قرار النقل . . ولم يغادر المكتب إلا حين اطمأن تماما أن المدير قد هدأت نفسه وزال منها أثر كلمات حيدر المنفعلة .

وبعد أسبوع من هذا اللقاء العاصف أصدر المدير أوامره بالموافقة على نقل محمد

وحيدر إلى اسراب المقاتلات وذهبا سويا لوداع المدير الذى انطلقت مشاعره بـلا حدود :

\* حانسمع عنكم كل خير انشاء الله . . أنا متأكد . . واحب أشوفكم دايما . . وأنا مش زعلان منك ياحيدر ، بس خللي بالك من نفسك . . الانفعال ياحيدر لازم يخللي الواحد يغلط . . واحنا طيارين يعني الغلطة تساوى عمر البني آدم .

وانصرفا من عند المدير وهما غير مصدقين أن المدير قد وافق على النقل وران عليهما صمت غريب بعد أن تحقق أملهما إلى أن قطع حيدر هذا الصمت إ

اوعى يا محمد تجيب سيره في البيت انى اتنقلت المقاتلات .

ولم يجب محمد بشيء فقد كان يدرك وقع مثل هذا الخبر على أهل حيدر خاصة والدته فاكتفى بنظرة صامته .

واستقر المقام بمحمد وحيدر في اللواء الجوى ٣٠٦ مقاتلات قاذفة لكن فرقت بينها الظروف فتولى محمد قائد ثان السرب المتمركز في قاعدة المنصورة بينها تولى حيدر نفس المنصب في السرب المتمركز في مطار قويسنا .

وتفجرت طاقات حيدر المختزنة فانطلق يعمل ليل نهار . . يتابع برامج السرب اليومية . . يتصدر الطيارين في التدريب النهاري والليل . . يضع نفسه دائها في أول نوبتجيات الطواريء . . يكثر من المرور على أطقم الفنيين حتى يتأكد من صلاحية الطائرات . . يطمئن بنفسه على أماكن المعيشة حتى للسائقين . . لكن رغم كل هذا النشاط والحيوية الدافقة ، صامت دائها . لا يتكلم مع الزملاء إلا في أمور العمل والطيران وبأقل الكلمات . . وحاول الزملاء في السرب أن يخترقوا حاجز الصمت الذي يفرضه حيدر على نفسه لكن الفشل كان نصيبهم في كل مرة ، وانتهى الأمر باحترام تلك العزلة التي يعيشها حيدر .

حتى جاء يوم العشرين من يوليو عام ١٩٦٩ وصدرت الأوامر للقوات الجوية المصرية بالدخول في حرب الاستنزاف التي بدأت منذ شهور مع إسرائيل . . وتلقى حيدر أوامر الهجوم بفرحة غامرة . . كانت لحظة منذ وقت طويل . . كان دوره في الهجوم هو تدمير محطة رادار إسرائيلية في عمق سيناء . . وكان باقيا على موعد الهجوم

ساعتان واندفع حيدر كعادته يشرح ويؤكد المهام على الطيارين ، يراجع خرائط الملاحة بنفسه حتى يضمن دقة التنفيذ . . يستحث أطقم الطائرات أثناء تجهيزها بالذخيرة . . حتى حانت لحفظة الإقلاع بتشكيله الذي يقوده والمكون من أربع طائرات .

\* الاتجاه الى الهدف ٩٣ درجة على البوصلة . . السرعة ٢٠٠ كيلو متر . . التشكيل في أماكنه الصحيحة . رغم أن معه اثنين من الطيارين الجدد . . لن يزيد الأرتفاع عن ٣٠ متر حتى تهرب من الكشف الرادارى الإسرائيلي . . سيناء المحترقة . . محمد قال سنقف مرة أخرى ـ الزمن ١٤ دقيقة حتى نصل إلى الهدف . . الخضرة الممتدة حولى في الحقول ، القرى المتناثرة ، الترع والطرقات الترابية ، الغلاحون عائدون في المساء مع دوابهم . . الأوامر صمت الاسلكي تام حتى عبود قناة السويس . من يوم ٧ يونيو والنار في داخلي . . «أحياء عند ربهم يرزقون» . قناة السويس . من يوم ٧ يونيو والنار في داخلي . . «أحياء عند ربهم يرزقون» . القناة قدامنا يا فندم :

\* كل واحد في مكانه . . عطة الرادار حاتبقى قدامنا على طول . . فاضل ٣ دقائق بوادر نجاح الهجوم ظهرت . . لم تعترضنا الميراج الإسرائيلي . . توفيق استشهد فوق سيناء . . نحن فوق سيناء مرة أخرى . قطعة لحمى التي نزعوها منى في حرب يونيو . . غالية تلك الرمال الصفراء . . لم نشعر بكل هذا الحب إلا حين ضاعت منا .

\* محطة الردار على شمالنا بالضبط . . كل واحد في مكانه وانقض بتشكيله في هجمات متتالية عنيفة متجاوزا الأوامر التي كانت تنص على هجمتين فقط ، لكنه زاد عليها هجمتين اخريين . . كان في نشوة غريبة أسلمته إلى غيبوبة كمن بلغ به الوجد الصوفي حد الثمالة . . كان منظر النيران المشتعلة في الموقع الإسرائيلي يشعره بطعم رجولته . . كانت الصواريخ والطلقات التي يلهب بها الموقع تندفع من لحمه ودمه وليست من مدافع الطائرة .

\* كل الطائرات شرق القناة ترجع فورا . . الميراج الإسرائيلي ظهر في المنطقة أفاق حيدر مع تلك الأوامر التي تكررت في اللاسلكي من مركز قيادة القوات

الجوية . فأعطى أوامره على الفور إلى تشكيله لاتخاذ أوضاع العودة إلى المطار . . واندفع في اتجاه الغرب حتى عبر قناة السويس عند مدينة القنطرة .

\* نقيب حيدر « ميراج على شمالنا » مِسافة ٧ كيلو متر .

وفى لمح البصر كان حيدر يلتقط موقع الطائرات الإسرائيلية على يساره ، وكانت مازالت تبحث عن الطائرات المصرية العائدة من الهجوم . . كانت تلك الطائرات أكفأ من الميج ١٧ فى القتال الجوى ، علاوة على أن اثنين من طيارى التشكيل من ذوى الخبرة المحدودة وهذه أول طلعة قتال حقيقى لهما يكفى انهما دمرا الموقع الاسرائيلى بنجاح تام . . وعلى الفور اتخذ حيدر قراره وأصدر أوامره للتشكيل فى اللاسلكى :

\* لو الميراج شافونا حسن حايرجع بالتشكيل ، وأنا حا آخد . . . .

ولم يكمل حيدر أوامره حيث وجد التشكيل الإسرائيلي وكان من طائرتين ، يتجه ناحية تشكيله . . وعلى الفور انفصل حيدر بطائرته عن التشكيل وتسلق حتى ارتفاع و ٢٠٠٠ متر حتى يظهر واضحا . أمام الطائرات الإسرائيلية فيجذب انتباهها ويتيح لباقى التشكيل فرصة العودة في سلام . . ونجحت خطته السريعة التى قررها في ثوان ، واندفعت الطائرتان خلفه . . كان يدرك أن الموقف صعب وحرج فهو يواجه طائرتين بمفرده من طراز الميراج الذي يتفوق على طائرته الميج ١٧ بكثير . إذن ليدخل الاشتباك وهو يعرف أنه لن يستطيع إصابة أى من هذا التشكيل الإسرائيلى . . ودخل الاشتباك وهو يبغى الخروج سليها فقط ، وبهذا يكون قد نجح في حماية تشكيله وعودته سالما .

وفى ثوان وجد التشكيل الإسرائيلي وقد انفصل وأصبحت طائرة على يمينه وأخرى على يساره وأيقن انها يريدان وضعه بينها حتى يندفع وراء إحداها فتجهز عليه الأخرى فى نفس اللحظة التى يندفع فيها . . وتجمعت كل خبراته وأفكاره السابقة عن الاشتباكات الجوية . . حسنا . . لتكن المناورة رأسية وبعنف شديد . . ونجحت المناورة فى المرة الأولى ولم تتمكن منه الطائرتان ، فقام بتكرار نفس المناورة لكن فى نهايتها عكس الاتجاه بسرعة خاطفة . . استطاعت إحدى الطائرتين اللحاق

به أما الثانية فلم تتمكن من عكس الاتجاه بالسرعة المطلوبة وخرجت من المعركة بعد أن بعدت المسافة بينها وبين طائرة حيدر . . نجح في نصف المهمة . . لكن الطائرة الأخرى مازالت خلفه . . لتكن المناورات كلها في اتجاه الغرب حتى يبتعد عن القناة . . وجذب طائرته بكل ما أوتى من قوة وصرخ حتى لا يصاب بالعمى المؤقت الذي يصيب الطيارين إذا زادت المناورة عنفا عن حد معين . . ونجحت المناورة وأصبح الطيار الإسرائيلي في وضع أقل من السابق . . لابد أن يتابع المناورة حتى يتحسن موقفه مع الطيار الإسرائيلي الذي مازال إلى الخلف قليلا . .

وكانت مناورة مجنونة ، اقترب فيها من الطائرة الإسرائيلية إلى أمتار معدودة حتى أنه شاهد الطيار الإسرائيلي داخل الكابينة مرتديا أفرول أزرق . . وفي لحظة لمع في ذهنه خاطر كالبرق في ظلم الليل . . ليدخل بطائرته في عين الشمس التي كانت تميل إلى الغروب ولن يستطيع الطيار الإسرائيلي متابعته . . وظل في عين الشمس لثوان مرت عليه وكأنها ساعات خرج بعدها وهو غير مصدق . . فقد شاهد الطيار الإسرائيلي وهو يأخذ اتجاها مخالفا تماما ، فاندفع بكل سرعة الطائرة ناحية الغرب حتى يبتعد عنه . .

وبدأ يتبين موقعه فوجد أنه شرق مدينة السنبلاوين واكتشف أن الوقود المتبقى لن يكفيه حتى يصل إلى قويسنا ، فقرر الهبوط فى مطار المنصورة وأبلغ مركز العمليات بذلك .

وكان لقاء حاربين محمد وحيدر رتبت له الأقدار ، كان محمد قد عاد بتشكيله من فترة قصيرة بعد أن دمر مواقع للعدو في سيناء أيضا . . كان السرب كله في فرحة غامرة فقد نفذوا جميعا مهامهم بنجاح تام وعادوا جميعا سالمين . . بهت محمد حين رأى حيدر يدخل عليه مبنى السرب ، لكنه أدرك على الفور أن حيدر هبط اضطراريا في مطار المنصورة لسبب ما . فاندفع يعانقه

# الف حمد الله على السلامه . . خير . . إيه أللي نزلك عندنا .

وتبسم حيدر وهو مصدق أنه عاد بسلام:

\* اسكت يا آبو حميد . . جوز يهود اصطادوني واحنا راجعين . . عدوك يا محمد

ميراج بقى ودخلت معاهم فى حتة اشتباك . . لكن أخوك بسبع أرواح . . طلعت سليم إزاى مش عارف ؟ وفى تلك اللحظة شعر محمد بأنه يجب حيدر حبا كبيرا فقام وعانقه مرة أخرى .

\* ألف حمد الله على السلامة .

وقضيا قرابة الساعة في استعادة ما حدث عند مهاجمتهم لموقع اسرائيلي ثم تجهزت طائرة حيدر للطيران فرحل عائدا إلى مطار قويسنا بعد أن تواعدا على اللقاء في أقرب أجازة لهما قادمة . . وتوالت الهجمات الجوية المصرية على المواقع الإسرائيلية في سيناء . وكان محمد وحيدر يلتقيان تليفونيا بعد أي من تلك الهجمات حتى يطمئن . كل منهما على الأخر . . ومرت شهور حتى رتبت الأقدار لقاء مثيرا ، فقد فوجيء محمد بأن حيدر يتصل به من القاهرة .

\* انا باتكلم من مصريا محمد . . وياريت تقدر تنزل النهارده علشان فيه موضوع مهم وعايز أشوفك ضرورى .

\* أنا نازل النهارده لان عندى مأموريه بكره الصبح فى المستشفى . . وحا افـوت عليك النهارده بالليل .

ووصل محمد إلى القاهرة واتجه على الفور إلى حيدر والقلق ينشب أنيابه فى كل خلاياه وتفكيره . . فما هو الموضوع الذى يدفع حيدر لأن يطلبه بمثل هذه اللهفة .

\* أهلا يا محمد . . تعالى نقعد في الصالون لوحدنا . .

كان حيدر متجهم الوجه وجو المنزل مليئا بالتوتر والقلق

\* الحاجه عرفت موضوع نقلى من اسبوعين تقريبا . . ومن ساعتها والبيت قايده فيه حريقه . . طول النهار تعيط وعايزانى ألغى النقل . . وبابا اللى طالع عليه إنى لازم اتجوز دلوقت ، وأخلف كمان . .

وقاطعه حيدر منفعلا :

\* خد الموضوع جد يا محمد . . انت ما عندكش فكره ماما شكلها إيه : وبدأ القلق يعاود محمد مرة أخرى :

\* طيب وماله لما تتجوز . . مش غلط يا حيدر اللي بابا بيطلبه منك . . انت النهاردة عندك ٢٥ سنة يعني أصغر مني بسنة واحدة وانا متجوز وعندي ولد كمان .

وفوجىء محمد بـوالدة حيـدر وهى تقتحم عليها حجـرة الصالـون ثم أصيب بالدهشة من الانهزام الذى وضح فى ملامحها . . كانت تبدو وكأن الحزن قد امتص منها رحيق الحياة .

\* بقى يا محمد تبقى عارف إن حيدر اتنقل من الكلية وما تقولش حاجه . وانعقد لسان محمد وشعر بأن الموقف ليس بسيطا كها كان يتخيل :

\* معلهش . . يا حاجه . . اصل الموضوع . .

ولم تعطه الفرصة ليقول شيئا وإغا اندفعت كلماتها مغلفة بدموع لا تستطيع السيطرة عليها :

\* هو انت نسبت توفیق یا محمد واللی جری له . . مش کفایه حرقة قلبی علی واحد . . لازم یبقوا اثنین . . وهو أنا أقدر استحمل حاجة تانی بعد توفیق . . . حرام علیك یا حیدر ده انا امك . . ده انت اللی فاضل لی . . توفیق راح ، وأخوك الصغیر وهاجر ، واختك ومسافرة هی کمان ، یبقی انت کمان عایز تروح تحارب علشان یجری لك حاجه . . یا ابنی حرام علیك . . ماحدش حاسس منكم النار فی قلبی شكلها ایه . .

وقامت والدة حيدر دون مقدمات بعد أن أفرغت جزءاً من كثير بملأ صدرها ، ومحمد صامت يريد أن يبكى مشاركة لها في تلك الأحزان ، لكن دموعه كانت صعبة جدا ، فهو لا يذكر أنه بكى من سنوات عديدة .

\* قلبي عندك يا حيدر والله . . ربنا يصبرها . . وكان الله في عونك انت :

\* انت شفت حاجة بسيطة . . أمال لو قعدت معاك شوية وحكت عن توفيق والبنت اللي كانت حاتخطبها له ، والفرح ، والمعازيم ، وحاجات كثيرة قوى . . والإخر تقول ده مات وتقعد تستغفر ربنا . وأشعل محمد سيجارته الرابعة علها تزيح

عنه جزءاً من حالة الحزن التي غمرته بشدة .

\* بص یاعم حیدر . . طبعا انت مش ممکن حاتفکر فی النقل تانی للکلیة . . وبرضه دی أمك یا حیدر ، یعنی لازم نفکر فی حاجه تریحها شویة من العذاب اللی هی فیه . . وانا شایف إن والدك عنده حق قوی فی موضوع جوازك ده . .

\* بس أنا مش عايز اتجوز دلوقت . . وبعدين مفيش وآحده معينة علشان أقول اتجوزها .

\* يا سيدى دلوقت والاكمان سنة ما انت حاتتجوز . . وبعدين إن كان على الواحدة ندور عليها وأكيد حانلاقيها . . والدتك يا حيدر شاعرة إن الأمل اللي كانت عايشة علشانه بيموت قدامها ، خصوصا بعد سفر أخواتك . . لازم تلاقى امل جديد يا حيدر ، وده حاييجي من إنك تتجوز وتخلف عيل والا اثنين :

ولم يمض سوى شهر على هذا اللقاء المثير إلا وتوقفت حرب الاستنزاف . . وكانت فرصة لالتقاط الأنفاس بعد أن هدأت الأمور . .

وانقضت ثلاث سنوات بعد وقف إطلاق النار . . تزوج خلالها حيدر من عروس شابة وإن كانت تصغره بعشر سنوات . . ثم شاءت الأقدار أن يجتمع محمد وحيدر مرة أخرى ، فتم اختيارهما ضمن مجموعة من الطيارين للسفر إلى ليبيا للتدريب على الطائرة الميراج واصطحب كل منها أسرته إلى طرابلس حيث تجاورا في مساكن الضباط الموجودة بالقاعدة . . وسمح لهما البعد عن جبهة القتال أن يجارسا حياة أسرية هادئة مليئة بأوقات مرحة متفرقة مع العديد من الأصدقاء المصريين الذين كانوا في طرابلس . . لكن حتى في تلك الأوقات كان حيدر صامتا لا يتكلم إلا في النادر

\* انت مش ملاحظ یا محمد إن الكابتن حیدر دایما ساكب ، یمكن احنا علشان مدنیین مش مبسوط معانا .

\* لا يادكتور على . . حيدر ده أصله حكايته صعبة قوى وهو على طول ساكت كده :

\* ما انت بتتكلم معانا عادى . . يعنى معقول هو كده مع زملاؤه فى المطار . وانفرد محمد بحيدر فى ركن منعزل بعيدا عن مجموعة الأصدقاء والتى كانوا يمضون

- معها السهرة .
- \* احنا يا حيدر موجودين في الحياة علشان نعيشها .
- \* وهو انا مش عايشها يا محمد . . سمعت كلام ابويا واتجوزت ، ومنى حامل ، وقاعد معاكم زى بقية الشله فيه حاجه أقدر أعملها تانى ؟
- \* انت هاتخبى على انا يا حيدر . . ده انا اللي عارف كل حاجه . . انت بتنفرج على الدنيا ومش عايز تشارك في اي حاجة .
- \* بص یا محمد . . الحاجة الوحیدة اللی أقدر أشارك فیها ، وأعیشها زی ما بتقول هی الحرب . . ودی بقت شیء بعید . . یا عالم امتی حاتحصل ؟
- \* لا حاتحصل والله . . وحانحارب تاني يا حيدر . . وتفتكر يعني الناس اللي قاعدة دى كلها مش نفسها الحرب تقوم .
- \* الناس دى مش حاسة بأى حاجه . . وآهى ثالث سنة تعدى ومفيش حرب والعملية بقت شيء عادى .
- \* متهیألك . . الناس اللی انت شایفها بتضحك دی ضحكتها كلها مراره وحزن :

ولم يمض على تلك الجلسة إلا شهر تقريبا ، سافرت بعده منى الى القاهرة حتى تضع مولودها الأول . . ثم صدرت الأوامر بعد شهر بعودة الطيارين المصريين الى القاهرة . . واستقر محمد وحيدر فى السرب ٦٩ الذى تمركز فى قاعدة طنطا الجوية بطائراتهم الميراج . . وكان حيدر أسعد الجميع بأوامر العودة الى القارة . . فقد شعر بأنه عاد الى موقعه الطبيعى ، كها وإنه شاهد مولودته التى اطلق عليها اسم «ملك» وتوالت الأيام رتيبة فى تدريب روتينى . وكان توالى الأيام على تلك الصورة يزيد الجميع إحباطاً ويأساً . . إلى أن بدأت الأوامر تتغير وتطلب تجهيز خطط للعمليات ، وكان محمد هو المسئول عن ذلك ثم بدأ تدريب الطيارين على هذه الخطط . . وكان حيدر يشترك فى هذه التدريبات لكن دون حماس ، فقد ملأه اليأس حتى ظن بأن الحرب لن تقوم . . ورغم أن الشواهد كانت تتزايد بأن الحرب قادمة لكن حيدر لم يكن يصدق أياً منها .

\* بقى لنا سنين واحنا بنعمل الكلام ده يا محمد . . وفي الآخر حيطلع إنه مشروع أو مناورة :

\* بس المره دى يا حيدر متهيأ لى أنها جد .

\* نفسى أصدق يا محمد بس مش قادر .

وبعد هذا الحديث بيومين فقط جاءت أوامر الحرب . . وتلقى محمد الأوامر التفصيلية مساء الخامس من أكتوبر ٧٣ وفي صباح اليوم التالى اجتمع قائد السرب بالطيارين وأعطى أوامره الخاصة بالأهداف والخطة العامة للقوات الجوية ثم غادرهم إلى غرفة العمليات تاركا لمحمد شرح الأوامر بالتفصيل .

\* أولا . . نقرا الفاتحة كلنا ان ربنا يوفقنا ويكتب لنا النصر . . ثانيا كل واحد يفطر . . ثالثا انا اللي حا اختار أسهاء كل تشكيل على حسب المهمه المطلوبه . . يعنى مش عايز حد يقول اشمعنى فلان اسمه فى الطلعة وأنا لا .

وانطلق محمد يشرح للسرب كافة المهام المطلوب تنفيذها بالتفصيل الدقيق والتصرف في كافة الاحتمالات التي يمكن أن يتعرض لها أي تشكيل أثناء تنفيذ مهامه . . لكن ما أن انتهى من اجتماعه بالطيارين وغادر غرفة المحاضرات حتى لحقه حيدر مسرعا .

\* محمد . . موضوع الأسهاء والطلعات مش حاتنازل عن دورى فيه أبدا . . انت الوحيد اللي أقدم منى . . يعنى أول تشكيل انت والثاني يبقى أنا على طول .

وشعر محمد أن حيدر يضعه في مأزق . . لأنه في قرارة نفسه لم يكن سيضع حيدر إلا في آخر تشكيل ، أو ربما لن يضعه نهائيا في الطلعات . فكان لأبد وأن يجيب عليه بطريقة رسمية :

\* طيب لما أنا الأقدم زي انت ما بتقول ، يبقى أوامرى هي اللي تتنفذ .

\* مقدم محمد . . أنا طول عمرى عارف كويس إن فيه أقدمية بيني وبينك ، ذى ما فيه اخويه وعشره . . لكن طول عمرى بافصل بين الأقدميه وبين الصحبية . . لكن الا في موضوع الطلعات ده . . بالأقدميه يعنى بالأقدميه . . وثانى تشكيل انا اللي حااكون فيه ولا يمكن حايكون حد ثانى وأراد محمد أن يخرج من هذا المأزق فحول دفة الحديث :

- \* يا سيدى سيبنى أجهز للطلعة بتاعة النهارده مش يمكن أروح وما ارجعش . . حاتبقى ساعتها أنت أقدم واحد وحط الأسهاء على كيفك .
  - \* لا ياسي محمد حاتروح وحاترجع بالسلامة انشاء الله عمر الشقى بقى . .

وقام محمد بقيادة أول تشكيل وكان ضمن الضربة الجوية الأولى التى انطلقت فى الثانية ظهرا معلنة بداية حرب تحرير سيناء . . وعاد التشكيل كله سليها بعد أن أدى مهمته بنجاح تام . . كانت هذه الطلعة بمثابة البعث الذى أيقظ الجميع وكأنهم أهل الكهف وقد دبت فيهم الروح مرة أخرى . . واجتمع الطيارون فى المساء تملؤهم الفرحة الممزوجة بالقلق والتوتر .

- \* مش قلت لك حاتجارب ثانى .
- \* غرفة العمليات بتقول إن الضربه الجويه كلها نجحت ، أربع طيارات من مائتين طياره.
  - \* والله وحاترجع أيام الاستنزاف ثاني .
- \* لا . . استنزاف إيه . . الجيش بتاعنا عبر القناة . . المرة دى حرب علشان نرجع سينا كلها .
  - \* بس الخوف اليهود بكره الصبح حايردوا إزاى ؟

وفى صباح السابع من أكتوبر هاجمت الطائرات الإسرائيلية قاعدة طنطا ونجحت في إغلاق المطار وتدمير جزء من الممرات .

- \* مش قلت لك اليهود حايردوا . .
- \* يا خوفي احسن تتكرر ثاني ٦٧ .

يا حضرات طنطا بس هي االى اتقفلت . . المنصورة وانشاص وأبو حماد وكـل المطارات سليمه وشغاله . . واحنا على الضهر انشاء الله حيكون المطار سليم .

وانطلق الطيارون بعد الهجوم الإسرائيلي يشاركون جماعات الإصلاح والمهندسين الذين يقومون بإصلاح الممر ، بل زاد الأمر أن بعضهم قفز فوق العربات وتولى قيادتها . وكان لهذا أثر بليغ فقد اشتعل حماس جماعات الإصلاح حين وجدوا أن الطيارين يشاركونهم العمل بحق . . وجاءت أوامر الطلعة الثانية بتدمير مواقع

للعدو في سيناء بتشكيل مكون من ثمان طائرات ، على أن يتم التنفيذ بمجرد صلاحية الممر

واستدعى محمد الرائد حمدى على انفراد وأبلغه بأنه سيقود التشكيل الذى سيقوم بتنفيذ هذه الطلعة . . وما هي إلا دقائق حتى اندفع حيدر مقتحما المكتب على محمد :

\* أظن يا محمد أنا اتكلمت معاك في موضوع ترتيب الطلعات ، وانت وطلعت أول طلعة يبقى أنا اللي لازم أطير الطلعه دي مش حمدي .

وحاول محمد أن يمتص غضب (غضبه) حيدر ويكبح جماح انفعاله، فتعمد أن يخاطبه بلهجة رسمية:

\* رائد حيدر . . أنا قلت الموضوع مش حايكون بالدور أو بالأقدميه . . وعموما أنا شايلك للطلعات الثقيلة .

\* ثقيلة والا خفيفة . . انا اللي حااطلع المرة دي يعني أنا .

وزادت حدة المناقشة بينهما وتوترت الأعصاب . . ومحمد يستميت في أن يثنى حيدر عن رأيه . ولم يجد مفراً في النهاية إلا أن يقول له :

\* دى أوامر العقيد على . . روح له غرفة العمليات واتناقش معاه :

واندفع حيدر خارجا دون تعليق وبعد حوالي نصف الساعة اتصل العقيد على بحمد تليفونيا:

\* مفيش فايده يا محمد ، حاولت معاه بكل الطرق . . خلاص اكتبه هو قائد التشكيل .

وتنهد محمد فى صمت واستدار إلى دفتر أوامر الطيران وكتب أسهاء التشكيل بقيادة الرائد طيار حيدر دبوس وجلس فى مكتبه على انفراد حتى دخل عليه حيدر وعلى وجهه ابتسامة وكأنه انتصر عليه .

\* بقى خايف يا محمد أحسن اموت .

\* مش موضوع خوف يا حيدر . . الحكاية ان . .

ولم يتركه حيدر يكمل فقد كان يشعر بمدى الحرج الذى يعانيه واستراح محمد لمقاطعة حيدر له .

\* ده انا ساعة اليهود ما هاجمونا الصبح ، شظية قنبله فاتت جنبي بمتر . . يعني كان ممكن أتوكل وانا على الأرض . . هو انا حااقولك انت يامحمد الكلام ده .

ولم ينتظر حيدر رد محمد بل اندفع مناديا على أفراد التشكيل حتى يشرح لهم المهمة والاحتمالات التي يمكن ان تقابلهم .

\* يعنى فى النهاية عايز التشكيل يهد الموقع على اللى فيه ما يفضلش فيه طوبه واحده . وقبل موعد الطلعة قام محمد بدعوة أفراد التشكيل على كوب من الشاى ، وجلس معهم لكن مرارة ساخرة كانت تثقل صدره فقد كان حيدر يتكلم كثيرا ومحمد صامت إلا من كلمات مقتضبة .

\* تصور «ملك» بنتي ابتدت تعرفني مع إن عندها خمس شهور . . بقت عفريته ولذيذه .

\* ربنا يخليها لك .

وتمتم محمد في نفسه «ويخليك مها» .

وحان موعد الطلعة بعد أن تم إصلاح المر . . وأصر محمد على أن يقود العربة الجيب بنفسه ويقوم بتوصيل الطيارين إلى أماكن طائراتهم . . وهبط حيدر عند طائرته ، ولحقه محمد وانفرد به آمام الطائرة :

\* حيدر . . أوعى تكون زعلان مني . . انت عارف إن انا . . .

ونظر حيد إليه بنظرة ملؤها الحب والعتاب:

\* ادعى لى يا محمد .

\* موفق انشاء الله . . خللي بالك يا حيدر ، وبلاش الانفعال .

ولم يحاول محمد ان يسلم على حيدر أو يأتى بأى شيء غير طبيعي رغم أنه كان فى داخله متوترا وقلقا بصورة كبيرة .

وانطلق التشكيل بقيادة حيدر وقد انتابه شعور غامر بالفرحة ، لم يشعر به حتى فى ليلة زفافه . . وفى دقائق كان حيدر يعبر قناة السويس . . كان كمن يلقى بنفسه فى احضان حبيبته سيناء التى طال الشوق إليها . . وانتابه ذلك الإحساس الصسوفى الرقيق .

\* وحشتينى . . ثلاث سنوات فراق . . حته من لحمى . . توفيق أخويا مات هنا . . ست سنين والنار والعة فى قلبى . . رمل وتراب لكن غالى . . ملك بنتى لما تكبير لازم تيجى وتشوف سينا . . رائحة الطين فى البلد لما كنت أزور قرايبى الفلاحين . . محمد قال حانرجع تانى . . شمسك حاتطلع يا مصر . . احنا فينا ناس كويسين قوى . . أمى حبيبتى لها أرجع عايز حضنك . . مصر بخير طول ما فيها شباب زيكم . . «احياء عند ربهم يرزقون» . . النهارده يومك . . طعم الرجوله حلو . . دبابات مصر شرق القناة . . بالاش الانفعال لإنه حايخليك تغلط . . اليهود الكلاب .

\* الموقع قدامنا بالضبط يافندم

وانفصلت الطائرات بأوامر من حيدر استعدادا لمهاجمة المواقع المحددة . . واستسلم حيدر لحالة الوجد والنشوة التي تنتابه في كل مرة يهاجم فيها اليهود . . كان الدفاع حول المواقع كثيفا ، والنيسران المندفعة كنافورات من لهب تطارد حيدر وتشكيله .

\* انا ومعايا حسن حانهاجم المدفعية . . رفعت ومعاك باقى التشكيل تهاجموا المواقع . وانقض حيدر على الموقع الأول وثقته كبيرة فى نتيجة الهجوم . . فهويهاجم المواقع بطائرة ميراج وهى أسرع وأقدر على المناورة ، وتسليحها أقوى . . وحبس انفاسه بعد ان التف جهاز تنشين الطائرة بالموقع ، حتى أصبح فى مرمى الاطلاق فضغط على زر اطلاق ثمانية صواريخ كانت كافية لتحويل الموقع إلى شظايا وأشلاء تتطاير فى كل اتجاه . . وتكرر ذلك مع الموقع الثانى .

- \* الله ينور ياراند حيدر . . سلم ايديك يافندم .
- پالا يا شباب كله يدخل يضرب وهو مطمئن .

وارتفع حيدر بطائرته حتى يهاجم الموقع الثالث ، وكان باقى التشكيل قد اندفع يقصف ويدمر فى المواقع الاسرائيلية . . لكن المدفعية كانت أسبق منه هذه المرة فقد لحقه مخروط النيران واتجه نحو طائرته .


\* خللي بالك يافندم

لكن حيدر لم ينتبه إلى تحذير حسن بل ربما لم يسمعه فقد كان صوت السكون يطغى على كل شيء حتى على هدير محرك الطائرة . كل ما كان في حواسه قد تركز في عينيه التين تحجرتا على الموقع الذي سيهاجمه . . وفي لحظة تصميم وانفعال اندفع بطائرته . . وكان لابد وان يصطدم بتلك النيران . . فتهتز الطائرة بعنف لكن بكل ما أوق من قوة استطاع ابقاءها في وضع الهجوم منقضة على الموقع تماما . وغاب عن الوعي تماما إلا يديه التين تحجرتا على عصا القيادة وشريط سريع يمر بخياله يرى فيه صوراً متداخلة لأمه ومدير الكلية ، واقاربه الفلاحين . . وتهوى الطائرة محترقة داخل الموقع الإسرائيلي ، وتنفجر براكين الغضب المحبوسة من سنوات طوال وتحيل الموقع كله إلى دمار شامل . .


ويعود التشكيل دون قائده ويهبط فى القاعدة ، ويكون محمد هو أول المستقبلين لطيارى التشكيل يسجل تقاريرهم عن الخسائر التى تمت فى مواقع العدو ، ويقوم بإبلاغها لغرفة العمليات . . ويستفسر عن كيفية استشهاد حيدر

\* والله يافندم لولا الرائد حيدر ماكنش حد فينا عمل نص اللي عمله .

ويخرج الطيارون من غرفة المحاضرات والصمت يغمر الكون كله . . ومحمد . . يسير بمفرده ينظر إلى الشمس الزاحفة إلى الغروب ويتمتم في سره (أحياء عند ربهم يرزقون) .



General Organization of the Algebraic Matter (GOAL)



رقم الإيداع بدار الكتب ١٩٩٣/٨٠٩٥

ISBN 977-01-3470-8

انقضت الساعات الباقية علي موعد الطلعة وانطلقت الطائرات تعبر في موعدها وما هي إلا عشر دقائق إلا وكانت الطائرات تعبر قناة السويس واطمأن طلعت لما رأى طائرات التشكيل زاحفة حوله في أماكنها تماما.. وفي الوقت المحدد على الخريطة ارتفعت طائرات التشكيل فوق الموقع الاسرائيلي وفي ثوان معدودة وبتعليمات منه انقلبت المنطقة إلى كتلة من الجحيم، فقد اندفع طيارو التشكيل يقذفون الموقع الإسرائيلي بقنابلهم وصواريخهم المغلفة بحقد غريزي لكل ما هو إسرائيلي في الوقت الذي كان الموقع الإسرائيلي في بادلهم النيران من مواسير المدافع المضادة للطائرات وكانها خراطيم لهب مستمرة.

مدير التحرير

r A

18